

國

朝

列

卿

紀

國朝列卿紀卷之二十六

吏部尚書行實

陸完字全卿直隸蘇州府長洲縣人成化丁未淮

監察御史歷浙江副使江西按察使有幹才逆濠獨器重之正  
德三年陞都察院右僉都御史巡撫宣府逆瑾見其言動遲緩  
改南院右僉都御史四年畏瑾威談納賂於瑾陞都察院右副  
都御史五年進兵部右侍郎未幾轉左及瑾敗言官劾完首開  
賄賂之門驟陞風憲之職不報六年霸州等處強賊劉六劉七  
齊彥名等肆亂初舉都御史馬中錫提督軍務以玩寇殃民下  
獄中官以此事非書生所能辦乃命太監谷大用總督軍務推

完提督軍務伏羌伯毛銳掛平賊將軍印充總兵官時統兵萬餘素未簡閱銳又衰老而大用擁衆自衛高坐堅城故京軍屢失利不能速平賊兵部奏令完帶主事田蘭等招募民兵大擾地方又奏調宣府遊擊許泰卻永大同總兵張復遊擊江彬入征內地多妄殺平民冒功完不能制後賊過江大掠吳楚之間至蘇州遇颶風覆舟始滅歸而論功谷大用并代大用者太監陸閏皆封其弟爲伯完進右都御史尋改左都御史掌院事八年陞兵部尚書加太子少保時完與逆濠歲時問遺不絕濠問完欲乞復護衛完答書須以祖訓爲言及逆濠輦金寶以伶人臧賢分饋柄事者大學士費宏言於內閣曰今寧王以金寶

江蘇打點復護衛苟聽其所爲吾江西無噍類矣完不聽竟附  
錢寧輩題復護衛十年閏四月改吏部尚書時江西左布政張  
嶺爲濠所忌完受錢寧囑陞光祿卿以遠之十四年三月上  
自稱威武大將軍欲巡兩直隸山東江南湖廣內外咸以爲憂  
修撰舒芬等約諸同志上疏乞留會闕下完迎諸上疏者曰  
主上聞直諫輒引刀爲刎狀今日撒賴矣其容色詞氣盡歸咎於  
上以沮言者一時言官又多其黨遂爲所沮七月宸濠叛逆伏擒  
言官劾其交通狀逮獄籍其家謫戍

王瓊字德華山西太原府太原縣人成化甲辰進士授工部屯  
田司主事弘治四年陞本司員外郎六年進都水司郎中九年

改戶部陝西司郎中有治才留心國計凡舊卷條例悉錄之以  
備稽閱十二年陞山東右叅政十四年守制十六年補河南左  
叅政十八年陞河南右布政正德元年陞整理兩淮鹽法都察  
院右副都御史二年取回改緡管漕運未任陞戶部右侍郎三  
年改吏部本年調南京吏部四年改南京戶部右侍郎丁憂六  
年起戶部右侍郎兼左僉都御史賑恤畿甸山東地方七年陞  
戶部左侍郎八年陞戶部尚書瓊在戶部陝西司於泉貨出入  
數目素熟練嘗著論謂國初制親王歲支祿米一萬石後因地  
方豐歉或有減支郡王將軍俱有常祿亦因民供有限悉減支  
一半本色一半折色其折色多不關支又如初封郡王歲支二

千石以後襲封俱支一千石後亦有例初封郡王亦支一千石  
又如郡王生子多至二三十人者有之慶成王生七十子夫以  
十子論之一歲該支米一萬五千石反多於一字王祿米矣先  
年陝西慶府分封郡王俱於慶府一萬米內分撥并軍校亦於  
大府分出不知彼時奉何事例又如鎮國等將軍年十一二歲  
卽請封號祿米弘治十一年因災異禮部會官議修省事件郎  
中慈谿王綸白於諸大臣定議鎮國等將軍年及十五歲方准  
撥支祿米至今行之以民供論之則日益不給以宗室論之往  
往衣食不繼反不如庶民之家得自生計也又宗室犯罪降爲  
庶人者計口月給米石比與將軍中尉反得實惠宗室例不得

種田納糧商販管利而常祿不給日見其貧乏不能存活矣又  
國初定制百官俸給皆支本色米石如知縣月支米七石歲支  
米八十四石足勾養廉用度後改四品以上三分本色七分析  
色五品以下四分本色六分析色後又改在外官月支本色米  
二石其餘俱支折色其折色以鈔爲則每米一石折鈔十五貫  
或二十貫每布一疋折米二石京官折俸四五年不得一支外  
官通不得支俸祿之制果能守哉欲禁貪婪是以難也故在戶  
部於邦儲歛散酌盈濟縮不尚同亦不求異凡非分干請有違  
成憲者執奏不易苟可以厚宗室利官民者亦調停行之人服  
其有心計十年改兵部十一年六月加太子太保十二年三月

加少保兼太子太保先是左都彭澤在院時嘗與言官論及朱  
寧輒忿曰吾恨不手刃此奴瓊以語寧且曰吾爲君致彼來君  
私察之瓊因招澤過匿寧屏後瓊激怒之澤果大罵寧由是銜  
之會土魯番反瓊與澤有隙誣奏澤激變番夷以啓邊釁下兵  
部議瓊因劾其擅命遣使納幣失信致起邊釁乞令法司按實  
議罪會多官議戶部尚書石玠以爲大夫出使於外苟有利於  
國家專之可也事須再勘瓊曰納幣虜庭失信夷人致貽後患  
於國家利乎不利乎事已勘明更勘何事衆不能奪奏上朱寧  
營內旨除澤名十一月加少傅兼太子太傅瓊善結權幸故遷  
兵部不二年二進三孤初南贛撫鎮非人兇民羣聚爲盜焚劫



州縣無忌遠近效尤凡在虔楚閩廣接壤無非賊巢瓊薦王守仁巡撫其地及守仁請便宜行事衆笑爲迂屢不報瓊慨然曰朝廷此等大柄不與此等人用又與誰用我必與之竟覆議報可諸賊由是悉平十四年正月守仁乞致仕當路素忌之欲從其請瓊力言不可從留之會福州三衛軍人進貴葉元保等作亂瓊知江西寧藩必反召主事應典曰此小事不足煩守仁但假此便宜勅書在彼手中以待他變爾爲我做一題稿來看既成具題勅守仁查處福州叛軍及給事中徐之鸞等疏宸濠不法事內閣楊廷和令兵部發兵觀變瓊曰此不可洩近給事中孫懋建議選兵爲江西備留中日久第如議行之廷和默

然已而宸濠反南都告急瓊會衆於左順門獨曰君子素行不義今倉卒造亂不足爲慮有王守仁在彼必成擒矣頃刻覆十二疏詔削濠屬籍正賊名次請命將出師趨南京勅伯方壽祥防江都御史俞諫率淮兵翊南京戶部尚書王鴻儒主給餉王守仁率南贛兵由臨吉都御史秦金率湖廣兵由荆瑞會南昌李充嗣鎮江許廷光鎮浙江叢蘭鎮儀真慎防瓜州壩傳檄諸路但有忠臣義士能倡義旅擒反者封侯且令南京守備操江諸武職并五府掌印僉事卽自陳取上裁務在得人以固根本詔悉從之濠果不旋踵就擒十五年十月改吏部尚書加少師十六年世廟登極五月以人言謫戍嘉靖年起兵部尚書

兼都察院右都御史總制陝西三邊軍務時吐番侵擾甘肅瑄督兵擊敗之八年套虜入寇統兵三萬出花馬池禦之斬首六十餘級捷聞勅賜獎勵尋以功加太子太保九年洮岷番夷寇鞏昌命將擊討之斬首三百五十餘撫定七千餘族降勅嘉賞又置下馬關門接修邊牆一百八十餘里起憇水堡至蘭州因地形勢挑壕塹八百餘里據險以守邊人至今便之十年召還改吏部尚書卒贈太保謚恭襄

石瑄字邦彥直隸真定府藁城縣人成化丁未進士改庶吉士累官禮部尚書兼翰林學士瑄性介特辨畛域自歷官以來費不涉公帑役不越輿隸環堵蕭然於義外錢不啻若臭穢正德

十六年以人望改吏部尚書承羣小竊柄之餘政以賂成官以  
意授士習靡然日趨於壞屬考察京官凡諸清議有干者多見  
屏黜登賢汰冗不可以私干於得喪禍福了無芥帶輔臣楊廷  
和等忌之托詞以請命兼學士在內閣專管誥勅實奪之權也  
前無此故事而楊亦以此見短於人其前後所上封事士林多  
錄之其要語則勸上清心省事法堯舜之恭已無爲用漢文  
之與民休息而已其願上力行王道辯別忠邪中才皆可用  
之人不必求備平易有近民之實不必務奇治有端緒不必責  
効於旦夕之間事可包荒不必刻意於淵魚之察人謂其爲救  
時之藥石久之人典機務門無私謁其剛方正直終始不變官

至少保詳內閣

喬宇字希大號白巖山西太原府樂平縣人十七歲爲成化庚子以金吾衛籍中順天府鄉試錄其文以式甲辰中進士通政司觀政丙午授禮部儀制司主事是歲 皇太子婚禮成及

五王冠禮畢俱受文綺白金之賜明年會試天下士署提調官綜理有法撒棘之日簾內什用之器類爲所司所取悉還之民丁未母路氏卒歸葬樂平杜門謝客讀禮之暇惟以讀書考究爲事自是所養益深祖塋有松數百樹皆先人手自封植夏有蟲食之幾盡乃自爲文以祭遂止弘治庚戌服闋除吏部文選司主事壬子署考功司員外丁巳補郎中辛酉調文選司郎中

益勤勵門無私謁凡三與考察輿論稱允至於拔進賢才杜塞  
僥倖屏退憊壬無不贊行之壬戌遷太常少卿八月有事南郊  
命導駕齋壇孝廟賓天以執事送梓宮於泰陵正德改元  
丙寅武宗卽位告祭天下命分祭中鎮霍山黃河西海媯皇  
商湯王陵及晉代藩諸王陵園事竣之日咨諏民隱爲六事上  
之多見采納戊辰轉光祿卿專以裁節浮費以甦民困爲務一  
歲陞戶部右侍郎庚午遷左侍郎春至六月不雨漕河涸奉  
命禱祭海嶽遂雨時宦瑾用事公卿多通關節宇恬然自守後瑾  
敗獨皦然不爲所汙辛未轉南京禮部尚書乙亥改南京兵部  
尚書叅贊機務治尚簡靜說者謂得畢公保釐之道時番國烏

思藏傳聞國西有童子記其前生事者以爲活佛。上遣使迎之。上疏極論其事甚傷國體。且云：國朝祖宗相承所以不絕番僧朝貢者。不過羈縻遠夷而已。非崇奉信惑之也。陛下天縱聖明。無微不燭。抑豈不知西方異端佛教無益中國。迨乎南京御史林有年以言事被逮。上諭救得釋。上巡遊無時。宣大之地往來數遠。又復事於關陝。以伐虜爲名。乃上言：天命人心累數百言。無不剴切。是時前星未耀。中外危疑。疏乞早建皇儲。以安定宗社。俱不報。已卯寧濠之變。濠與留守太監劉珣交通。欲取南都。宇廉得其實。卽偵誅其往來者。并制珣不與同事。多執間諜。以梟江岸。濠計頗沮。至安慶爲守備楊銳。

敗之濠怒曰安慶一蕞爾尚如此况南京乎且聞喬尚書甚有  
備將如何也乃殺方士數十人謀退兵是夜西北風惡甚舟纜  
盡絕比曉至鄱陽湖遂爲都御史王守仁乘之不戰而敗先是  
宇視機務時密得濠反狀又知指揮銳有才略可用迺署爲安  
慶守備誠之曰安慶南京上遊密邇江西賊計汝必先知知則  
速來告之賊至必先攻安慶攻則汝死守之未幾賊變銳果能  
成其功十二月 上南狩至則叛逆已平遂受 朝正於 行  
在初有 旨命百官以戎服朝見宇獨以爲兩京禮儀一體豈  
容有異遂朝服率諸臣見時幸臣江彬怙權寵勢焰傾人統邊  
軍數萬起從屯處京城懷不軌心宇以雅量鎮服其邪彬始亦



欲構宇使人嚮撫其事卒無所得一日晚彬遣兵官索各城門鎖鑰城中驚駭不知所出督府遣人來謀於公公曰守備者所以謹非常城門鎖鑰孰敢索亦孰敢與者雖天子詔奈何督府以公言拒之竟寢城中帖然彬每假傳旨有所求爲日數十通公每得旨必請面奏彬計遂不行鎮安都城隱然虎豹在山之勢及駐蹕旣久倡九卿臺諫凡上三章勸回鑾輿以定安社稷爲計九月上還京師扈從至揚州歸辛巳五月考績錄前功加柱國少保兼太子太保七月詔拜吏部尚書辨論官材總統百度杜請託錄遺逸至於君子小人之際尤加意焉賢必進不肖必退中外翕然稱之世宗入承大統新政之初銳

意圖治其倚重之宇亦忠勤靡倦知無不言言無不盡革弊興  
廢効力尤多與刑書林俊戶部孫交兵書彭澤協心輔政癸未  
王會之期裁革冗濫至二千員餘前此未有也甲申以議與  
國大禮不合抗疏乞休歸樂平始買地建宅徜徉於山林中至  
朝廷之事多不言及戊子詔前議禮之罪得冠帶閑住辛卯鎮  
江少師邃菴楊公卒宇門下生也拏舟渡江吊之及過江日南  
京父老識者舉手加額曰活我公也多遺之以禮不受九月歸  
偶感痰疾於十月二十六日卒年六十八宇少從學楊公於京  
師時楊公爲中書舍人談經之學甚盛天下名士多從之游而  
成就者衆公遂爲高第旣而舉進士又從文正西涯李公游益

肆力於文字間其所友者海陵儲公礪晉江蔡公清毘陵邵公  
寶和順王公雲鳳臺城石公珪德行道義漸磨者深焉一向皆  
居清秩雖少煩劇其餘暇必友會作文自太常轉南禮書得讀  
國初秘書性命道德浩如也自今北方之士言文苑者必首稱之  
爲文不以蹈襲爲工出入六經深沉釀郁自成一家有克家稿  
若干卷其爲詩始擬古作後擺落陳辭往往多自得語識者以  
爲渾然一代大家之作樂府雄雉有作者風氣性嗜山水嘗歷  
雲中上恒霍登嵩華海岱搜奇探隱人莫之及通篆籍有二李  
風晚精鑒賞名書古帖一見知之性淳儉家居所用皆陶甕之  
器衣服恂恂與寒士角而延接儒雅如恐不及見善常如已出

見不善惡形於色卒之日識與不識言之多有歎息泣下者至二妾從死尤人所難可以見其至誠所感云

紀聞云公長身偉貌聲如洪鐘博學好文工篆籀善圍碁負一藝者悉得延見獎掖遇事從容裁處無疾言遽色待官屬有禮馭輿隸有恩盛怒未嘗出惡言休休有容得大臣之體雖其天質之美而所以養之者亦有素也

楊旦字晉叔別號偶菴福建建寧府建安縣人太師文敏公榮之曾孫也初父仕儀娶周氏三月而妊七月而仕儀公疾且逝又三月旦乃生其生也伯叔父有夢鳳棲公舍者曰是兒也其將繼文敏公之武而起乎甫髫齡果穎異絕倫年十二三仰承

慈訓亟肆力於學十七補郡弟子員二十四領成化癸卯鄉薦  
丁未落會試遂卒業大學司成丘文莊奇之弘治庚戌登進士  
二甲第一名授吏部驗封司主事卽見重於太宰三原王公恕  
丙辰陞考功員外郎未幾陞稽勲郎中辛酉轉考功風采剛方  
品藻精確卽科道顯貴人罔敢干以私兩秉述職之衡黜陟惟  
允時太宰青谿倪公岳性嚴毅慎許可顧獨器重之繼青谿者  
鈞陽馬公文升尤峻急難近每持正議初若相迂卒乃聽其言  
嘗考察京職有佞夫被黜寅緣奏辯者有旨再覈實馬倉卒拜  
命欲改擬以從旦毅然持不可曰祖宗來未有此例且倖門一  
開後將謂何都御史浮梁戴公珊亟是之而馬亦悟竟覆罷垂

覈之命同官張綵者奇袤人也每匡以正而張顧不之悟後竟以黨逆瑾敗云甲子陞太僕少卿乙丑改太常正德丙寅乞恩歸省蒙路費寶鏐之賜丁卯起復逆瑾欲一覲見卒不見遂以違限例出知於溫溫海邦也地大物衆務劇奸藂治之不遺力郡以大治時瑾之偵邏旁午州羣吏苦其誅求皆慄慄焉曰獨鎮以靜民恃以安有庠生某者與趙爭貢獨夜飯歸爲讐家徐績紀兄弟毆而死其僕畏徐兇莫敢言家爲謂必趙也訟之官官枉坐趙罪有同知林繁者廉得其實上冀獄旦覆之趙竟雪平生守已端潔自謫宦以來大書上帝臨汝毋二爾心於座右僚吏遵度不敢縱永嘉令王獻臣者以御史謫茂視前守逮事

旦則敬畏獨至焉居溫二年庚午遷爲浙江副使督學政會當  
鄉試以五閱月週迴數千里所校士允愜公議若拔寧波增廣  
生余本於久屈之中是秋竟高薦明年廷試及第至今浙上夫  
猶服其精鑒辛未逆瑾誅又起爲應天府丞尋進尹順天順天  
素號繁劇難治竟就緒貧民有負肉供不能償者請以贖罰并  
帑藏之羨者以代仍禁縣吏無重科巨寇劉六等流劫近畿又  
四方流民薦食京師道殣相望因募人爲叢塚收葬之人多感  
泣壬申陞南禮右侍嘗攝國子監事士心歸之時武宗在位  
已十餘年矣而皇儲未建乃與司馬經川張公燦宗伯白巖喬  
公宇議請擇宗室之賢者育於宮中以繫天下心二公欣然

會九卿具疏以請 上雖不疑行人稱其忠尋轉禮右侍掌太常寺事裁抑浮費民力賴以稍紓丙子改戶侍奉 勅總督京通等倉時總督監督中貴人多且剋剔奸蠹特正不回屬官倚以爲重而中貴人久亦自服丁丑西羌回賊犯順甘肅釋騷

廷議推文武大臣總制三邊奉 勅督理糧餉所在克足開中鹽

課以其餘均給三邊及賞賚哈密有功人哈密人推戴 上恩

誓不敢負甘肅者漢酒泉張掖之故地也文敏公爲學士時扈

從 文皇帝西征故嘗過此且忠言感乎甘人舉手加額曰是

大賢之後也莫不遮道登瞻以獲誠爲幸守陞都察院右都御

史總督兩廣軍務兼理巡撫時嚴枉道之禁念母老疏請便道



展省允之且錫蟒衣羊酒寶鑑等厚資抵家侍彌月亟戒行以  
夏六月抵任乃肅紀綱飭武備省刑獄汰苛濫百度燦然一新  
會番陽清遠河源等縣蘇峒十八山滴水巖青龍崗帽子峰等  
寨徭僮負固稔惡所過大肆焚掠民甚苦之乃調集官軍土兵  
命僉事王宗源都指揮董禎等分道並擊斬級一萬一千有奇  
俘獲四千一百有奇奪回擄掠男婦二百三十有奇牛馬騾重  
不可勝紀鎮守太監王堂總兵撫寧侯朱麒以捷聞 聖書褒  
獎兼有駢蕃之錫云已卯秋宸濠之變南贛撫治都御史陽明  
王公咨援兵旦卽委兵備僉事王大用朱昂都指揮歐儒千大  
經整兵以行仍會總鎮總兵檄副使汪鉉都指揮董禎達官都

指揮馬英率驍勇五千繼之而鉞意不欲乃鼓浮言以惑衆旦  
恐其敗事遂改委僉事王大用統領直薄南昌前後凡九咨王  
公又咨巡撫湖廣都御史秦金云西江之變正臣子竭忠效命  
之時况順逆邪正老壯曲直之形昭然明其逆黨可刻期而破  
因選漢達兵三萬餘將親率以往焉尋得報元惡已就擒地方  
底定遂罷行田州府土官岑猛知府岑濟族黨也弘治間濟亂  
猛降級指揮僉事因功陞指揮同知寅緣奏辯覲復其官會  
龍州知府趙源亡嗣襲以姪相猛因黨其妹所立假子韋璋者  
賂京還驛使詐傳詔旨起兵遂與璋襲破龍州逐知州趙相  
乃賂遣本兵及當國者猛圖以功贖罪復原職璋圖冒趙宗奪

龍州請託於臣執不可當國者廣人也子弟素與叛人通而本  
兵司馬擅作威福巡撫者歲有厚餽公獨無三人交怒乃嗾巡  
按廣西御史曹珪誣劾之吏部爲之駁白詎竟不行未幾聞母  
周夫人計奔喪歸家哀毀踰禮先是巡按御史汪珊特薦其賢  
有操履端純學識閑雅士林高標縉紳翹楚等語嘉靖壬午服  
闋遂起掌南院尋陞南戶書南蒞任又改南史書甲申秋吏部  
白巖喬公字致仕廷議會推旨又改旦以北具疏力辭不  
允會見山桂公羅峯張公以傳奉陞學士口率部院諸老上疏  
論列語極激切用是忤旨遂爲給事中陳洸所誣劾并及東  
閣大學士吳公一鵬吏部右待汪公偉疏下吏部議時左侍郎

孟公春覆題亟辯其誣且曰此必奸邪欲竊三入官故先爲之  
闢路因發洸奸私乳請有所懲罰以警將來竟有 旨令旦及  
汪俱致仕既而公論大譁科道交章辯其誣論洸之奸者若彭  
汝寔徐錦戴金朱衣張曰韜藍田輩無慮數十人抵家坦然自  
適放情於溪雲山月間以詩酒自娛未幾科道論薦右給事中  
王俊民謂其學術純正才望懋崇足以壓服天下之心若御史  
鄭洛書司馬泰浦鉉吳大本施山或謂其忠宣恭毅執德不回  
或謂其器度文學操持行業俱宜起爲冢宰俱不報且祇事  
三朝歷中外幾四十年所蒞若銓衡學校甲兵錢穀禮樂刑獄  
馬政邊防皆諳極要領且清介絕俗奉身甚約至於軫窮恤族

諸惠利事則爲之又其力性至孝奉母周夫人雖顯貴待養不  
少衰初成化間宗黨避難業已籍沒比貴乃力贖其兄鬲雪辯  
竟蒙 恩復如初文敏公祠雖立而祀未虔乃疏以請卒如南  
陽李文達公例春秋祀焉月朔必薦新旦必具衣冠率諸子姓  
謁祠退而立諸堂下必訓以忠孝大節庚寅秋七月危坐而逝  
逝之前月躬享文敏公昧爽觸風露故遂嬰疾云年七十一贊  
曰楊自漢喜封赤泉侯震殖以清德迄唐而宋代有聞人 明  
興文敏公崛起於閩又繼以公傳曰公侯之後必復其始信哉  
初 宣皇帝時漢庶人反檄 廷臣奸狀爲兵端榮首贊 親  
征議甚決變卒賴以寧當逆濠之變也海內震驚公復陳師鞠

旅協贊王公以成犄角今讀其咨義形於色真文敏公之風哉  
若文敏公望在四朝功在三陟行業在天下而公之轍迹東巡  
山海西略甘肅北歷鴈門南抗嶺表則又足以張文敏公之烈  
也詩曰續我祖考其公之謂夫

廖玘字

直隸東光人弘治庚戌進士五年授吏部考功司

主事十二年丁憂十六年起復補稽勲主事十七年陞稽勲司  
員外十八年改文選正德元年養病二年補考功三年改文選  
四年陞文選郎中本年陞太僕少卿七年陞提督四夷館太常  
寺卿尋改太常寺十一年陞工部右侍郎督廠事十二年陞吏  
部右侍郎十四年轉左十六年陞南京吏部尚書嘉靖元年改

南京兵部三年改吏部尚書加太子太保六年致仕加少保卒  
贈少傅謚僖靖

羅欽順字允昇江西吉安府泰和縣人弘治癸丑進士第三人  
授翰林編修十三年陞南京國子司業正德三年逆瑾黜爲民  
五年起用原職七年陞南京太常寺少卿九年陞南太常卿掌  
南京翰林院事十年陞南京吏部右侍郎十四年改吏部右十  
六年陞吏部左侍郎嘉靖元年陞南京吏部尚書二年改禮部  
未任丁憂六年起吏部尚書未任致仕卒贈太子太保謚文莊  
欽順德性純雅卓有時望士之知與不知惟恐其不見用也居  
家以孝友稱與兄欽忠欽德皆以高第居顯秩並有時名海內

翕然稱之

國琛集云欽順莊篤由衷動執梨棊不能撓以非因自號整菴人固信其爲整也凡出處取與必欲印有成憲嘗曰人立身居業必先打破義利關否則擾擾直到底其教人每以是致嚴官至尚書甘茹清素晚年居一樓數載以終

李承勛湖廣嘉魚人弘治癸丑進士嘉靖六年推吏部尚書未任改刑部歷兵部尚書太子太保卒贈少保謚康惠詳兵部桂萼江西安仁人正德辛未進士嘉靖七年任八年入內閣加少保兼太子太傅卒贈太傅謚文襄詳內閣

方獻夫廣東南海人弘治乙丑進士嘉靖八年任九年養病十



一年再任尋入閣歷少保兼太子少保卒贈太保謚文襄詳內閣

汪鉉直隸婺源人弘治壬戌進士嘉靖十一年任加太子太保十四年劾免卒贈少保謚榮和

許讚河南靈寶人弘治丙辰進士嘉靖十五年任二十三年入閣詳內閣

熊浹江西南昌人正德甲戌進士嘉靖二十三年任加太子太保二十四年以諫箕仙忤旨爲民

唐龍字虞佐浙江金華府蘭谿人太夫人方寢夢獅踞門而向日驚寤而龍生日光正射蓍也幼卽岐嶷有奇志而機神警朗

讀書過目卽融領從鄭進士聽菴公受易弱冠遊楓山章文  
公門二公皆經師遂理性而文懿益博通古今典章經世之務  
龍並得其銓要弘治辛酉舉於鄉登正德戊辰進士授鄉城令  
郊荒敝甚民戶流亡至則煦嫗愛養紆恤勞來之身勤約以率  
僚吏歲旱則徒跣請禱甘澍隨應於是百穀豐成流民相繼復  
業戶口稍益繁焉屬流賊起燕齊殘破州邑無筭鄉當賊衝乃  
崇城浚濠治戰具選城中壯子弟并召鹽徒且乞兵督府爲備  
禦計未幾賊至攻城不利則拔營奔馬頭集因勒兵追襲之斬  
獲二百餘級數日賊步騎二萬來報馬頭之役又乘其未定縱  
壯士奮擊之復斬首百餘賊怒因糾合各部黨號三萬直趨郊

勢甚熾乃製碗口長柄等炮賊至炮發連斃其驍銳六十餘人  
賊大創以去旣騰檄當道連帥喜曰賊寧不可破城寧不可守  
顧人自怯衄耳卽布郊檄諸州俾觀法郊城令焉後竟以軍功  
陞俸二級龍初蒞郊視縣倉餘小麥數斛庫惟有銀三兩深以  
爲憂曰卽緩急何賴於是節省措置其後積粟麥至二萬八千  
石銀亦至三千餘兩其破賊城守抑恃儲蓄爲固云三年威惠  
流邇士民孚悅訟獄益平治績爲山東最至沂岱間有滯訟皆  
願屬郊城令決之以篁嶼公憂去服除擢監察御史出按雲南  
時武廟數出狩奸孽實導之上疏乞戒巡遊以安夷方因斥  
江彬等罪請寘於法以爲不臣之戒土弁鳳朝明以罪廢厚賂

寵臣錢寧寧諷鎮巡諸官洗雪規復用又首駁正之寧乃矯內批俾襲部檄下又執奏於朝遂褫其職指揮盧和寧假父也殺人罪死寧囑獄官濫出之且致書於龍手裂其書竟致和於理凡再忤寧衆皆危之不爲動巡撫中丞以滇戍卒多冒補非世胄者將覈汰之其帥臣因稽其月給以激衆衆洶洶且爲變乃語中丞曰滇夷方也以夷治之乃安今官無追呼而尺籍悉備撫而肆之猶逾募配矣獨奈何欲擾之中丞以屬龍乃諭使給糧俾復其所而後衆定其他所建白皆懸契時宜滇人賴焉庚辰以選按江西江西承逆濠之亂百度蕩弛初發難時

朝廷命二璫暨都督許泰劉達帥禁兵討焉比至而濠平久矣然

猶恃威福凌虐吏士軍校皆占民舍以居剽黷淫恣乃甚於寇  
民不勝毒乃首收縛其邏卒且榜於市亟疏乞班師而促泰等  
行民始卽安時屬官功罪尚疑未白諸從逆者請託規避猶視  
事如故龍召而數之曰臣子事君有死無二夫脅從罔治謂凡  
民爾若等讀書受官食祿旣不能固封守又不能明節義乃爭  
先附降奉頭苟活尚得偃然居位爲權貴販卒耶卽日收其印  
綬而列其不忠之罪於 朝與褒節旌功之疏並行焉鎮守內  
臣崔和前在金騰大逞於民爲龍所劾治及再與從事貪暴益  
甚禁之如初和恨浹骨後和居中用事每伺求其短欲以危禍  
中之卒無所得師旅之後凶年薦臻龍極意民隱撫戢賑濟若

痛在膚血災數疏讀之令人垂涕議者以謂江西撫綏之功不在王新建下徐御史岱陳中丞洪謨交奏其功請亟超擢辛巳拜陝西按察副使提督學政其教以敦行誼正習尚變氣質崇節介勵廉恥爲先時士學趨詭異乃新正學書院分經建局選士羣肄之剗其奇靡而約諸理泰士興焉尤敏於精鑒品士校文錙銖不爽拔秀彥於髫童蒐茂異於寒畯凡所賞錄其後往往登進列爲名臣矣初元山席公書嘗令郊多善政龍時召故老咨而行之元山服其義遂相知重至是元山位宗伯方與宰衡異同龍因鄉試發策論朋黨陳列大義以諷元山閱錄曰是策專箴大僚非唐提學不能作亟呼泰吏語曰爲我謝唐君謹

受教矣其爲朝望所重如此巡撫中丞監察御史累章論薦

朝議徵列卿不果嘉靖丙戌進山西按察使風裁峻整事至迎解  
一道肅清驛置中作徒數十百人歲無所得食因夜噪而遁有  
司議加越獄罪龍曰此迫於饑寒計乃無聊耳且胥靡豈狂狷  
囚比耶乃薄笞其倡首者數人而議責其雇直爲緩期俾自持  
謀投所由郡縣輸直皆縱遣之衆泣謝去相謂曰公實活我願  
鬻身以毋負公卒無有沉其脾者不越歲而輸悉至其誠信感  
人如此丁亥入爲太僕卿七年擢左僉都御史總江淮漕兼撫  
廬鳳諸郡兩淮頻年災異出土蕪曠民困甚而長吏多賄政不  
恤民乃首頒吏誠以儆有位於是貪墨吏望風自解去又乃撫

民利病之大者以次奏請興罷之漕政久而弊滋隨宜修治其所規畫皆爲國經遠計淮當天下舟車之衝驛傳積壅潁河州縣役夫疲於奔命乃爲剔削伏垢立簿要勾稽之而奏省進奉快船及入貢夷若使馳驛者供索並從縮民以少紓江北之民苦養官馬積逋至有千餘匹吏急之不能得又有備用馬入之太僕土產不勝任則別市以償率一馬而費百金民弗能堪上奏乞暫停官馬而輸太僕者令折徵省費十五壽州正陽關推商通泰二州有無田子粒本皆一時權計而卒爲暴濫漕卒勞甚而又有船料之徵並奏罷免之徐沛新河之役調河南山東丁夫五萬餘供餽取給二百里外加以炎蒸病者相枕藉廷



議下之龍曰疏濬舊河而增築其堤自可通漕較之新工難易百倍卒如其議民不大勞而河迄通利承命慮囚平反者數十人釋輕罪二千六百有奇開府二年吏士懷服兵農感悅商工通惠威化大行己丑召爲副都御史北行日淮人老稚啼泣遮留至繪像生祝之建祠者相望焉其得民如此在內臺正色立朝百僚肅然憚其風采擢吏部右侍郎十年轉左署皆攝太宰事於時內閣權任重進退百官銓部皆取風指龍抗行已志介直不阿朝臣有坐論執政屏斥者數十人悉收用之無所避開國元勲劉基常遇春李文忠鄧愈湯和後皆失爵百餘年累經廷議弗能復乃稽據故典奏復之五臣子孫並得續封云每授大

吏必先器識而後才華進廉靜而抑奔競其小官則以資品叙  
之人稱公允會關內久饑民相食朝命發內帑銀三十萬賑  
之而胡酋吉囊擁衆十五萬人據河壩正俺答衆號四十萬亦  
出沒邊徼全陝戒嚴在廷會議推才望素著者昇以安撫之  
寄俄有特旨陞兵部尚書兼右都御史總制三邊軍務兼管  
賑濟事宜上軫念西土若救焚溺其夕詔輔臣討論西事  
授以德意俾卽內閣草勅坐以待旦云及受命入關躬歷村  
落宣布上恩區別機宜訓平糴蠲官逋寬私債節用度停勾  
攝撫逃移恤老羸收遺棄散糜粥給醫藥凡十餘事奏報上  
大悅有忠勤體國之褒計所賑丁口凡二十六萬流亡復業者

三萬三千有奇十一年秦又饑復奏請發其賑法仍舊而所活有加平涼趙時春日全陝五千里之地帶甲百萬之師不容朝之羣萃公以咫尺之掌畫而覆之無遺策焉於是邊備久弛虜每歲一深入蔓延二千餘里恣其虜掠而去諸路僅保管壁莫敢誰何至軍門簡戎行飭器械號令一新士氣皆奮而尤以選將領明賞罰爲先梁震王効劉文謀勇冠一時皆拔自麾下推誠任之卒爲名將云龍謂諸鎮帥曰虜徂中國兵不出塞故敢陸梁夫先人有奪人之心此兵要也壬辰秋乃親秉鉞帥師三萬由暗門直指陰山軍容甚盛鞀鼓之聲震於荒落虜驚徙管六百里不敢輕窺塞矣明年秋虜以精騎三千潰鎮遠關入薄

平虜城乃督震効等分左右哨馳至柳門夾擊破之斬獲一百四十級虜亟浮河而遁捷聞降勅獎勵有銀段之賜甲午春虜衆二萬分掠延綏時梁震赴大同故虜乘虛而入乃令趣震還至清水營會叅將任傑兵繞虜後合戰俘獲五十餘級其夏謀報虜三千餘潛營嚮水波羅地又檄諸將分布要害嚴兵以俟虜果猝至張鳳梁震前擊之虜潰乘勝逐北俘獲七十餘秋吉囊自將十萬騎入營花馬池乃令曰賊寇延綏張鳳主之寧夏則王効固原則劉文其折衝此亢則委之梁震部分已定虜從青沙峴犯延安會文率所部赴之設伏以要虜文自迎戰伏起乘之虜大敗斬獲百三十級王効與虜遇於興武營又敗之

獲級與文同梁震遇於乾溝大戰又敗之俘獲百八十餘計首級四百五十有奇奪夷器無算二旬之間凡三捷焉兵部奏劾曰始都御史王越襲擒虜首四百餘以功封威寧伯尚書王憲以三百餘級加太子太保蔭一子世襲錦衣衛百戶今虜酋親擁大衆志吞涼朔而唐龍連摧覆之較之往績事勢尤難而功級過焉古稱一月三捷今乃二旬厥功殊矣乞比二臣特加封蔭用答忠勲竟爲執政忌者所抑賞多薄焉大同之亂與北虜連王師討之未克乃遣梁震帥兵往援且以計携虜揚言西師百萬擣其巢穴矣虜師繇此却顧而震因得以降其城執其首惡一方底寧其力居多在軍於三邊四鎮山川地形險阨

歷如指諸掌爲圖置座隅卽寇至坐而籌之指授諸將方略悉中機要故動必有功在邊四年戎夏慕其威信 朝廷倚重焉丙申改刑部尚書時執法大臣相繼去位諸大疑獄宿留不敢決毅然任之惟刑之中總制都御史劉源清奉 命討大同叛軍將盡誅其黨代卒窮威因飛語以要撫綏 朝議惑之遂以貪功下源清於獄且議赦代事龍上言代凡三亂輒戕其帥諸鎮觀望苟事姑息不正王誅無以除亂本今罪伐叛制將邊人得以窺朝指矣於是國是始定而源清得減論外戚張延齡以罪逮繫奸人劉東山乘機上變搆間兩宮其徒朋與爲奸利告訐蔓引株連遠近被逮無虛日法吏坐獄不窮竟去者數十人

龍按得其妄狀竟抵東山於法都人快之異時議大禮大獄諸臣謫戍且十餘年業多物故前後論救者數十疏輔臣復從中申解不能得龍曰是難以口舌爭也顧明主獨可以孝感是歲丸廟成詔下覃恩懇疏請赦諸臣上許之得放歸者二十人有回天之力矣武定侯郭勛權傾一時欲攬諸司之柄條陳若干事其四事下刑部諸司怵勛勢酸議多依違獨奏參駁其妄勛每有請托輒復嚴辭拒之涿州豪李昭坐重辟賄諸權要前後上辯八十奏逋誅者二十餘年當朝審勛與執政皆勅使欲附比出之龍曰殺人者死必如律京尹劉淑相與當路大臣許奏發其陰私當路必欲寘之死龍曰殺人以媚人吾不爲

也淑相止坐落職由是多所忤貴戚大臣其年以尚書六年考  
加太子少保先是起家遊宦於鄉於京師於晉於淮再入秦皆  
奉太夫人以居自秦召入也太夫人思土南歸諸弟因留之時  
太夫人年踰八旬雅懷歸志爲所居位多危嫌疑涉規避低回  
久之至戊戌夏陳情乞休終養母詞旨酸切上嘉允之優以  
給驛公卿祖送盈道皆歎其忠孝兼盡全節完名都下觀傳以  
爲盛事旣歸閉門却掃朝夕侍太夫人起居飲食必親進之養  
志承顏曲盡其孝暇則進門下諸生討論義理商略今古間以  
文藝自娛若將終身家食六年臺諫謄章論薦凡三十餘疏大  
要以人品才器文武具修當倚以經國匡時不宜徇其私情置



之閒散 上念舊德特 旨起用甲辰秋推改南京刑部以地  
近便迎養故具辭未得 旨而進爲南京吏部尚書尋以北虜  
猖獗諸邊戒嚴 朝廷擬本兵非龍不可遂承 簡命仍勅兵  
部馳驛趣赴京奉太夫人北上且具疏乞收新命奉一 旨卿久  
歷邊陲才猷茂著本兵重任特茲簡用况母以祿養可勿復辭  
仍 勅兼管團營軍務以乙巳春至都總理樞密經略邊防未  
明振衣口中退食忘其勞瘁形爲之衰龍深識兵機以爲制敵  
之本惟在任將而故時驍勇總兵白爵李朝陽張鳳等皆坐罪  
久繫獄中其以詿誤閒廢者復數人自餘無可用者乃建議曰  
邇來諸邊解體正以二三用命宿將爲言官苛舉細故而文吏

復以法繩之摧落且盡繼之者懼怯自救不暇何以望其樹奇  
宣威哉夫蹶弛之才負俗多累寧當以二卵棄千城一蹶廢千  
里也故曰使功不如使過乞宥諸將在繫者令其立功贖罪廢  
錮者從宜用之得 旨會如所請 朝論韙之往年防秋率不  
能先事隄備虜去來若風雨然諸城收保恒不及事乃於夏中  
卽檄諸邊申嚴師律修城塹遠斥堠虜至則持滿待之至秋虜  
騎數萬軍於大同之北諸將出精銳逆之虜知有備遂引去自  
是邊境晏然代叛軍亡人胡者歲誘虜入驅牛羊子女徜徉而  
北以爲常龍曰是類有所恃且生他變乃密下教宣大二鎮令  
謹備非常俄而大同王子充灼等八人齎稱臣奏文及符印旗

牌等令二健卒走虜潛約攻城爲內應者總兵周尙文覺其狀遣人躡之徼外三百里執以歸得所爲表印卽檻送八王子并其黨數十人於京伏法其年八月加太子太保因乞恩得以今官貤封四代並殊渥云十一月轉吏部尙書旣蒞任謝表有云常平胸臆私好惡之心謹奉典章秉公黜陟之法其自許如此龍故嘗爲少宰習其利弊郎吏亦雅信服之銓部常格循資序進自其後多越次超遷其淹蹇者或株守一官而十年不調龍曰限資固賢愚同滯越格亦僥倖易生其失等職在銓衡均平爲允乃錄其年勞之尤深者數人進拔之以明資叙其有異能奇績自可不拘士論悅服歲貢生員當補敎職者待次京師

積二千餘人選部一歲六銓員不滿三百貧士久旅衣食弗給  
乃亟責所司吏檢究疏通之臺諫建白舉用廢才事下龍曰人  
才故可惜矧爲人所媚而淪誤者乎乃疏上四十人皆時望也  
雖不果行公議少伸矣故事推補除授皆太宰主之自左右侍  
郎皆不得與乃曰爵人於朝與衆共之故每舉必會僚屬叅詳  
裁酌有至更數書者而與二少宰少湖徐公宛洛韓公尤以德  
義相劘切有古同寅協恭之風會故大臣復起執政多所指摘  
欲因以傾因傷足移病乞告且謝宰事有 旨暫就私室調理  
部事仍署掌至五月病增再疏陳疾引年不允至六月疾益甚  
懇疏求去 上責以耨老忘國奪官放歸田里因昇疾辭 朝

去都城二十里轉劇不可行則僦屋以居旬日竟薨於旅舍其  
日大雷雨電光繞室移時乃定壽七十所著易經大旨若干卷  
漁石集若干卷雲南奏議江西奏議督府及總制奏議共若干  
卷傳於世

周用字行之直隸蘇州府吳江縣人自幼穎悟年十四去家力  
學寒暑不解衣弘治辛酉舉於鄉第三明年壬戌登進士拜行  
人奉使諭祭楚藩凡王所贈遺悉辭不受遷南京兵科給  
事中丁父憂服除改禮科給事中又乞南於是復得南京兵科  
正德間西僧言西番有復生大寶法王解知未來遣中官往迎  
上章力詆其誣願毋輕信崇以生民姦辭甚切直人多危之竟

得旨不加罪時中貴人用事黜陟多從中制於是尚書劉愷以下凡任數人言官劉經輩任外皆不繇選部又鎮守江西中貴人黎安非法致人以死中外皆無敢言者獨前後抗疏請罷愷等還經等以公用舍罪黎安以正法令天下快其論而賢用敢言遷廣東左叅議番禺盜羣起撫臣調土兵兼官軍分六哨合攻以用領龍門哨征藍囊諸寨與武臣分哨並進直抵藍囊擒斬九百餘人平其寨十有八事聞朝議以級不滿千沒其功不賞實以前敢言故當是時同事者欲多其級其所誅戮或不辯渠醜用獨矜之覈其可疑者悉縱之撫臣謂一僉事所獲級少也欲効治其罪乃以若干級遺之得免是舉也蓋其功雖

不蒙賞於朝而仁義之譽因是籍籍夫有所槩於人心也嘉靖改元陞浙江按察副使會丁母憂服除起爲山東副使備兵於臨清爲建設賞格令同盜者相首卽不復罪其罪盜自相疑畏不復相聚境內以寧遷福建按察使閩素多訟推鞠平恕獄無繫囚亦無冤民中貴人鎮守市舶臨於福州其日所給食資之驛館館人苦於劇費胥感額不能應乃例割其數公私稱便陞河南右布政使歲大旱民饑死者相籍至有相食者用職當清戎無分守之責然不忍坐視民之饑而斃也毅然白於撫巡請自往活之故事賑饑多里戶據報報多僞饑者多不被賑用不以屬人躬循野間戶貼賑濟字令民自齎以來遂以內帑所

發銀及措畫米物戶給之絕無遲留民溥獲實惠所活甚衆已而車從所駐雨輒隨注麥爲秀發民大賴之有叅政守汝南以養痾故訟牒紛積獄繫日繁民病之乃代爲分守卽先命有司盡釋其所繫以俟至則昧爽視事日讞數十輩心力過勤耳爲之不聞而南陽滯政俱次第頓舉矣八年陞都察院副都御史督南贛軍務移檄所屬曰當知不得已而用兵尤當知不得已而爲盜惟藩臬諸司之綱之紀抑郡邑長吏有守有爲源潔則流自清民安而盜自弭矣其言惻怛由衷莫不竦服有巨盜數輩阻山橫行捕久不能獲廉其黨有悔悟者召至諭以利害結以信義因以賞誘之遂奉成算俘斬來獻盜不血寸兵不輩束



芻而賊亂蠲除民得安畊人以爲莫大之功初橋廠權稅大重  
商皆避之他趨軍餉不給乃爲調停其輕重著之例商復趨之  
至今貽其利焉贛豪室多隱其田額以其虛稅竄之貧者命履  
畝計丈覈之盡革其私賦役以均流亡盡復召還理院事十年  
陞吏部右侍郎十一年轉左凡署掌部事者四尚書汪鉉舉用  
失當嫁其罪於用十三年調南京刑部右侍郎處之裕如不自  
辯亦不以介意十三年陞南京都察院右都御史律已甚嚴門  
無私謁上疏乞起廢其所推轂咸炳炳傑出海內有聲者兼操  
江兵亦以方略平太倉海寇而一方陰蒙寢兵之福十七年陞  
南京工部尚書 慈聖太后梓宮南祔 顯陵自京師直抵承

天上下江淮 聖念殊切用殫思勞力督治巨艦以奉安之棹  
宮賴安履無虞成 聖天子至孝而竟不一自伐工部物直往  
往以黠商賂先物未入而給吏緣爲奸乃爲立定式以釐之宿  
弊盡去常修都城按籍以程工而人不敢懈事城益堅改南京  
刑部尚書 九廟災坐自劾免晦養者五年御史交剡論薦二  
十二年起爲工部尚書督河政疏請修溝洫以防河決其事凡  
五皆不易之規給授資德大夫正治上卿二十三年改督漕運  
本年尋入爲都察院左都御史每御史按畿省輒誠天下刑獄  
頃濫極宜悉心推詳長吏貪墨首先劾去民斯得所矣例考察  
京朝官乃合諸御史詳稽各曹賢不肖狀手自籍記彙騰其等

以丹墨第別之所黜惟太甚不務苛碎然用至親乃亦在黜中天下以此翕然稱公九載秩滿加太子少保拜寶鑑上尊之

賜二十五年陞吏部尚書吏部銓品悉由尚書與郎中兩侍郎諸寮署唯唯非有大事不相叅決遂沿以爲常用以謂集衆思廣忠益繫臣子當爾況於吏部一切奮然懲之時宛洛韓公少湖徐公西陂劉公前後爲侍郎虛心咨諏求盡天下之情不自怙其諳識諸司亦各展所見以相佐助而吏遂不得用事蒞政勤甚疾作會冬天下吏羣然述職於朝祗承天子重命大計其治日取部使者所上籍詳稽之不遺纖微事甫竣而公卒是爲嘉靖丁未正月十九日年七十二事聞贈太子太保謚恭肅

命給傳舟歸其喪 命諭祭者四 命有司營其葬事所以褒卹  
之者甚備

國朝列卿紀卷之二十六終

國朝列卿紀卷之二十七

南京吏部尚書年表

師

達

山東東阿人國子生  
永樂二十二年任

黃宗載

江西豐城人進士  
宣德十年任

魏

驥

浙江蕭山人鄉舉  
正統十三年任

曹

義

應天句容人進士  
景泰元年任

崔

恭

北直廣宗人進士成化  
五年由吏部尚書調任

錢

溥

南直華亭人進士成化十五年  
以左侍郎掌部事陞尚書致仕

陳

俊

福建莆田人進士成化二  
十年由南兵尚書改任

王

與

南直武進人進士  
弘治元年任

張悅

南直華亭人進士弘治八年任改南兵部

倪岳

應天上元人進士弘治九年任歷吏部加太子少保

秦民悅

南直舒城人進士弘治十二年任歷南戶兵二部

林瀚

福建閩縣人進士弘治十三年任改南兵部

楊守陞

浙江鄞縣人進士弘治十八年由本部侍郎進尚書致仕

李傑

南直常熟人進士正德元年任改禮部

黃珣

浙江餘姚人進士正德二年任

王華

浙江餘姚人狀元正德二年任

劉忠

河南陳留人進士正德二年任歷內閣少師

梁儲

廣東順德人進士正德五年任歷內閣少師

孫

交

湖廣鍾祥人成化辛丑進士正德六年任改南京兵部尚書贈少保謚榮僖

張

燦

廣西南平人進士正德六年任改南兵部

孫

需

江西德興人進士正德九年任

劉

春

四川巴縣人進士正德十三年任改禮部

廖

玘

北直東光人弘治庚戌進士正德十六年任歷吏部加太子太保

羅欽順

江西泰和人弘治癸丑進士嘉靖元年任改禮吏二部未任

楊旦

福建建安人弘治庚戌進士嘉靖二年改吏部未任

顏願壽

湖廣巴陵人弘治庚戌進士嘉靖三年任改刑部

朱希周

南直崑山人弘治丙辰狀元嘉靖四年任六年致仕

吳一鵬

南直長洲人弘治癸丑進士嘉靖六年由禮部尚書調任加太子少保八年致仕謚文端

劉龍 山西襄垣人弘治己未進士嘉靖八年任改南兵部

嚴嵩 江西分宜人弘治乙丑進士嘉靖十二年任歷內閣少師

湛若水 廣東增城人弘治乙丑進士嘉靖十五年任改南兵部

關淵 浙江鄞縣人弘治乙丑進士嘉靖十八年任歷吏部太子太保

張邦奇 浙江鄞縣人弘治乙丑進士嘉靖二十一年任改南兵部

宋景 江西奉新人弘治乙丑進士嘉靖二十一年任

唐龍 浙江蘭谿人正德戊辰進士嘉靖二十三年任歷吏部加太子太保詳吏部

張潤 山西臨汾人弘治壬戌進士嘉靖二十四年以工部尚書丁憂起任二十六年致仕

張治 湖廣茶陵人正德辛巳進士嘉靖二十七年任歷內閣

王學夔 江西安福人正德甲戌進士嘉靖二十八年任改南兵部



屠楷

廣西臨桂人嘉靖癸未進士  
二十九年任改南京兵部

潘演

南直婺源人正德辛巳進士  
嘉靖三十一年任改南兵部

周延

江西吉水人嘉靖癸未進士三十二  
年任改南兵部歷都察院左都御史

楊行中

順天通州人嘉靖癸未進士  
三十三年任三十五年致仕

王崇慶

直隸開州人正德戊辰進士嘉  
靖三十四年任贈太子少保

鄭曉

浙江海鹽人嘉靖癸未進士  
三十五年推升任改京營

王用賓

陝西咸寧人正德辛巳進士嘉靖三  
十五年由禮部尚書兼學士調任

毛愷

浙江江山人嘉靖乙未進士  
四十五年任改刑部尚書

劉宋

湖廣麻城人嘉靖巳  
丑進士隆慶元年任

吳嶽

山東汶上人嘉靖壬辰進士  
隆慶元年任四年改兵部

王本固

直隸邢臺人嘉靖甲辰進士  
隆慶四年任萬曆元年致仕

劉光濟

直隸涇陰人嘉靖甲辰進士  
萬曆元年任

潘晟

浙江新昌人嘉靖辛丑進士  
萬曆四年任五年改北禮部

趙錦

浙江餘姚人嘉靖甲辰進士萬曆  
五年任十年致仕十一年起用

汪文盛

湖廣崇陽人嘉靖戊戌進士  
萬曆七年改任未上

何寬

浙江臨海人嘉靖庚戌進士  
萬曆七年任十年致仕

趙賢

河南汝陽人嘉靖丙辰進士萬  
曆十一年任養疾十二年致仕

畢鏘

直隸石埭人嘉靖甲辰進士  
萬曆十一年任

丘樞

山東諸城人嘉靖庚戌進士  
萬曆十三年任

李世達

陝西涇陽人嘉靖丙辰進士萬曆  
十四年任十五年改南京兵部

袁洪愈

直隸吳縣人嘉靖丁未進士萬曆十五年癸未上

楊成

直隸長洲人嘉靖丙辰進士萬曆十六年出養病南京禮部起用十七年改南京兵部

陸光祖

浙江平湖人嘉靖丁未進士萬曆十七年任

孫鑰

浙江餘姚人嘉靖丙辰進士萬曆十八年由吏部左侍郎陞任

南京吏部尚書行實

師達字九達山東兗州府東阿縣人由縣學貢入國子生洪武二十五年陳情養母求仕特權監察御史革除中陞陝西按察使時獄囚淹繫殆千人達至審其罪量輕重而決遣之浹旬之間獄爲之空丁母憂去壬午年 成祖入正大統召爲兵部右侍郎尋轉吏部右侍郎永樂四年營北京宮殿 命採木湖廣七年 成祖征虜命達總督餽運二十年 命署南京禮部事二十二年進南京戶部尚書兼掌吏部事宜德二年正月丙申卒於官遣官 賜祭 命有司治葬事初達任吏部時典銓衡者率任已自用不容於人往往不愜輿論達能詢衆以求公當

且能廉不取一毫非義錢其扈從在北京又視身介特成祖  
知之間語左右曰六部扈從之臣不貪者惟逵一人蓋上簡  
注有素云

黃宗載原名垕江西南昌府豐城縣人自幼喜學年十五歲已  
能爲里塾師爲郡庠子弟從熊伯機受春秋取洪武丁丑進士  
爲行人謹恪自治奉使西方未嘗受餽遺歷左右司正以父憂  
去治喪無違禮不飲酒食肉者三年服除領舊職永樂癸未以  
賢舉授湖廣按察司僉事時湖廣諸道惟銅鼓五開最難治分  
巡刷卷者多憚行蓋天下巨奸宿猾皆謫戍其間善舞文弄法  
興事撓官府而陰把持其短長往者欲稍按治卽糾結如沐漆

不可解從一切漫漶則見喚無可奈何多避不肯往宗載至  
刷卷卽毅然治行到武陵問風俗知其人苦於從軍女子惡爲  
軍婦不果嫁男子則慮婦家往從戍而以徭賦累已不果娶至  
年三四十猶獨處宗載召鄉老里正諭人道大端俾轉相告語  
務嫁娶以時不踰月成婚姻者三百餘家他縣聞風皆樂從俗  
爲之變乃榜論銅鼓五開諸姦豪數其罪惡且發其善端因不  
改寔之法衆知宗載務以德化人皆相戒勿犯莫有干於理者  
丙戌徵詣文淵閣修永樂大典書成受賞而歸戊子 順廷以  
海運糧餉赴北京下湖廣造海船四十九 命擇鳳凰之賢  
且能者蒞其事衆議以屬宗載而工部所屬各務皆宗載所將

聞於上以慈寧宗載鎮之以靜消其毒瘴而後其機牙不得不  
擾而成功已丑車駕將北征遣都指揮吳王統兵討廢王暴  
貪失期上謂按察司官不糾劾於是宗意益同僚皆坐累謫  
楊青驛宗載處之如平時遣一力受役而躬自執爨未嘗有不  
豫暇則閱書史以吟咏自娛癸巳復起山東道監察御史侃侃  
自持不肯少屈以徇俗乙未上親策士於廷時鴻臚寺無卿  
丞張斌任事時斌守功最狠戾多所中傷人頗懼之以不與讀  
卷至爭論上前不已宗載奏斌不學無識不可以讀卷乃置  
煩瀆聖聽如此當伏法士論壯之丙申命巡按交趾交趾  
城中儲軍營房覆以茅故多火宗載廉知軍民歲伐材陶瓦儲

官用然皆資權豪命三司幕官稽其數凡有取者皆著於籍由是無敢私費不半年營房皆易以瓦覆火患遂息時工部尚書東萊黃福掌交趾藩憲二司才行過人而不事邊幅御史往者多庸常視之至宗載獨恂恂恭讓而法亦不廢及歸行李蕭然無交趾一物東萊嘗語人曰吾久居此所接御史多矣惟宗載知大體己亥丁祖母憂居家有 旨奪情受貴州道監察御史益謹禮蹈義遇事必究極是非不曲隨於禍福利害不計也故再陷刑辟而賴公道以免甲辰 宣宗正位東宮妙選東宮僚職輔導置詹事府丞未幾陞行在吏部左侍郎時少師蹇義猶兼領吏部事多倚之宗載協力一心進退人才必合公論不苟



爲異同故一時號得人洪熙元年 賜誥命制詞有清潔平恕  
恭謹厚重之褒是年遣祀夏禹及南鎮會稽山因 錫鈔八百  
錠俾歸焚黃於墓下其後嘗奉 命往浙江理軍政及伐宮殿  
大材於湖湘設施措置舉不失宜故事集而民不告勞宣德十  
年 英宗嗣位臨萬邦顧南京根本重地建置百司以吏部爲  
之首宜得謹厚大臣往蒞之九月以 命宗載陞辭之日 詔  
進爲尚書以行正統八年以老疾求致仕 上初不許章四上  
乃許之歸豐城故第又幾年年七十九以疾終宗載在南京雖  
無遷選之勞而勞於馭吏正已率物無少回撓屹然如泰山喬  
嶽不可撼陰陽闔闢風雲雷雨以榮悴百物而細大不遺其施

博矣已未進階資政大夫詞曰寬和有執廉靜自待又曰小心  
順職始終不渝人以爲實錄當是時大夫公卿齒德之尊莫如  
宗載及致仕而歸猶康強無恙士大夫出餞都門外瞻望咨嗟  
二疏傳不過也

魏驥字仲房浙江紹興府蕭山縣人永樂乙酉舉人四年會試  
乙榜爲松江府學訓導遷太常寺博士甲辰從征國有大事驥  
悉與聞遷吏部考功司員外郎陞南京太常寺少卿正統三年  
陞行在吏部左侍郎以老辭調禮部又辭特改南京吏部示優  
待焉十二年九載入見乞致仕不允陞本部尚書景泰庚午四  
乞骸始得歸時年七十有七自承事郎累轉至資善大夫天順

甲申 詔下進階榮祿大夫賞纂修永樂大典聘考江西鄉試  
者二同考會試者三奉 勅巡視畿甸持節慶代府冊封郊廟  
耕籍諸禮典無不預驥爲人端重祇慎簡默廉勤爲本頗好別  
白君子小人其少舉於鄉聞父病不俟檄棘而回耄年事其兄  
教諭騏愈益恭謹在學校嚴師道與諸生衣冠相對不問寒暑  
蒞官所至崇正抑邪務大體山川增獲雙白兔圻內升瑞麥皆  
却弗奏漁陽復漢循吏祠復立洪武望祭北鎮碑昌平立狄梁  
公祠在吏部時中官王振怙寵勢見惟怕一方振亦不較呼爲  
先生有進士未終制來欲爲考功者同官可之驥曰選法不可  
擅又可上欺邪已已之變驥在南都寢食靡遑率諸司條陳討

胡安民之策多見施行法司因是恤刑有王剛惡逆訴寃或以  
其年少欲緩之驥曰此婦人之行天道不時正謂此也獄遂決  
翼日而雨又戍卒四人牧馬三人互毆一人死之有司却拷訊  
三人內一人當之驥曰罪一人則情可矜罪三人則律不合宜  
上請卒得 旨三人各杖一百改戍邊地餘多類此里居二十  
年無事不踰戶闕而遠邇敬禮候問者相屬於道遇鄉人言孝  
友忠信遇有官者言勤謹和緩布袍糲食不別治生其清修苦  
節人或難之尤不忘憂國與民語及輒感額以爲常其鄉故多  
水患有楊龜山湖隄遺跡挿堰塘瀝倡率修築一方賴之求文  
者不絕苟可與言不爲厭倦篇章之富山刊板刻幾徧天下有

南齊集若干卷松江志水利切要理學正義等傳於世成化七年八月戊辰上御奉天門顧禮部臣曰魏驥壽及百齡兼有德望朕深嘉悅其勅遣行人存問賜羊酒有司月給米三石贍之勅未臨所驥先以是年九月薨於里第有司已得請卹例祭葬既而其家以驥遺言上臣驥死無憾愧無以報朝廷恩恤之典乞辭免上曰老臣清儉固爾死出爾然邪不可不展其志其諾之茲兩事前所未有也死驥薨旬餘一夕大星殞其隣王文政庭中驥忽就枕口占云平生不作欺心事一點靈光直上行既薨而復語意不亂倏然而逝計贈諡與不識莫不嗟惜於人上相率走吊於門制服哭奠哀感尤深云謚文靖

天順日錄云魏公初爲松江教官汲汲成就人才諸生在學者候一更盡必携茶往視之見書聲者供茶一甌及至三更將盡必携粥以隨尚有讀書者供粥一碗且嘉其勤如此亦不頻數間旬一行士子咸感激後出其門者顯宦甚盛

塵談錄云魏文靖公驥以直道自持不苟徇俗正統初任吏部侍郎時中官王振怙寵而驕每出則雖部堂尊官亦歛輿迴避一日相遇於崇文門不爲避王銜之譖於內衆爲公危忽一日上御便殿召吏部既至問孰爲右郎驥且訊以近日曾有何事公慷慨言其故且曰臣不材位六卿臣不足惜朝廷名器可惜耳溫青慰之曰爾所言者是好官好官

南德錄云魏文靖公驥嘗以俸金百兩委人爲其家僕盡易之  
公竟不言他日事覺鞠出金還公其主始知公嘗語人爲子者  
當求名賢厚結之親有疾則信之必專彼召之必速來也公爲  
尚書北還一小舟常阻於要津其子稍設儀仗公見卽命撤去  
曰籍重於是耶

曹義年宜應天府句容縣人永樂九年以書經中應天府鄉  
試卒業本鄉過成祖文皇帝選入翰林讀中秘書於是益自  
淬礪肆力於文學登永樂乙未陳循榜進士尋改爲庶吉士先  
是宅旁有一背井殆百餘年泉忽湧出鄉人以爲兆義之興云  
歲戊戌授翰林編修丁母吳氏憂喪制未終詔奪情滿職秩

滿轉禮部儀制司主事仍直翰林未幾丁父憂服闋還官宣德  
乙卯陞吏部文選司員外郎自是始離翰林而專職銓曹矣正  
統癸亥知者薦爲浙江叅政上特留之明年陞文選郎中又  
明年陞吏部右侍郎士大夫相慶以爲得人義盡心率職品量  
人物鮮有不當時泰和王直爲尚書以義精選法凡黜陟賢否  
一以托之然義事王甚謹於事可否非經咨決不輒行以故王  
待之益厚且密嘗謂人曰曹公端人也己巳秋北虜犯京師奉  
勅提督官軍守衛正陽崇文二門晝夜不遑寧處者凡十餘日防  
範嚴謹虜避不敢近尋轉左侍郎時當多事之秋屢有建白其  
見諸施行者人用悅服景泰改元陞南京吏部尚書三載賜



誥進階資德大夫天順紀元年七十有二捧賀表自南京至

上念義累朝舊臣而年且老特賜致仕 賜璽書有典選著公平

之譽議事有忠諫之言之褒家居四年而卒義寬厚周慎不與  
物忤人有過必導以巽言不事訐直居官行已一以忠勤謙慎  
爲本不矯飾以取名舉外若渾涵而中有定見少師楊士奇素  
不輕接人然最愛重之每與商論人物別白賢否必據其實有  
不協者反覆不已楊樂從之尤篤於友誼編修邢譽卒而家甚  
貧哭之盡哀且買棺殮之并賻以白金其子鴻臚序班純聘而  
未娶復助以成之吳人沈義係內親家日衰薄有女四各爲具  
粧奩嫁之其一隣有竊其屋後木植者家人踪跡知之且詆且

索乃止之曰彼乏用故取之勿再言也其仁厚不校類如此卒年七十有六所著詩文有默菴集藏於家

崔恭字克讓直隸順德府廣宗縣人辛卯起補南京南京屬官中恃才放恣交通賄賂者多乃黜其郎中方嵩門相等十數人士風爲之一新南雍生歷事滿必抵北紀選而還卒業其中貧乏者病於往復率多淹滯乃疏其不便南士得紀選於南部者寔自恭始甲午勅叅贊守備機務與成國公開心見誠協力政令軍民皆翕然畏服城中恃以爲安丙申兩抗章乞休致不允明年夏以不視事者三月復乞歸田上特錫璽書以榮其歸文武餞於國門外者千人道傍觀者十里不絕嘖嘖其言

其賢歸十年足跡不入城府靜坐一菴教子孫讀書而已疾急謂諸子曰吾平生無益於國勿乞恩煩瀆竟不及家事卒年七十有一子二珂璿珂本從子璿生之明年恭以爲後廕國子生君子又謂不私其子云恭爲人寬平坦易中無芥蒂好善惡惡出於天性遇後生必談政事剛而能斷然仁愛之意未嘗不行乎其間愛惜人才獎拔後進惟恐不及初廣宗地僻士不見全書出貨市書及五經四書時義之工者貽之後廣宗之士科不乏人卒贈太子少保謚莊敏

錢溥字原博直隸松江府華亭縣人正統四年己未進士太監王振訪可教內侍書或薦溥試薈薇露詩大見稱賞授翰林院

檢討景泰辛未遷左贊善兼檢討七年修寰宇通志轉左諭德  
兼編修天順元年改尚寶司少卿仍兼編修時以奪門叙功  
多善希時言謂兵部尚書陳汝言曰方今論功行賞殆無虛日  
而母后徽號未加獨非缺典與汝言以其言奏英宗大加稱  
賞隨付史氏以行尋陞侍讀學士會修大明一統志充副總裁  
六年壬午頒詔安南充正使貽書與其王論郊迎禮甚悉比  
還希躡崇樞出入奄暨恬不畏慎有太監王倫者受業於溥當  
英廟大漸時倫出就溥舍妄議時政邏者得之以聞下獄罪且不  
測有左右之者乃得末減降廣東順德知縣成化二年丙戌以  
近侍懷恩出其講下薦復原官閑住九年起侍讀學士掌南京

翰林院事十三年陞南京吏部左侍郎掌部事十五年己亥九月六科十二道都給事中張海等劾戶部尚書楊鼎玉部尚書王復南京兵部尚書薛遠并溥四人妨政失職宜加斥罷不允時溥以進表至京 陛見後出吏部太宰尹旻詢江南時事溥答以南直隸大熟請以歸諸公北直隸大水皆溥與薛當之尹笑曰諺云女婿牙疼却炙丈母脚根爲之哄然傳聞禁內以資笑具溥不得已乞休陞本部尚書致仕卒謚文通溥性輕躁嗜進常作禿婦傳以譏大學士商輅初附王振繼以王倫諸璫爲與援屢被彈劾尚遷崇秩識者鄙之

陳俊字時英福建興化府莆田縣人正統丁卯試鄉闈以閩藩

第一人發解明年戊辰中進士第授戶部主事值父珪卒解官  
迎喪海南富土物一無所取服闋仍除舊職景泰甲戌差督天  
津諸衛官兵舊欠採秋青草卽上言採取舊有額已難徵辦況  
歲徵耶漁不可以竭澤 朝廷是之得減歲增之數三十五萬  
束令止輸原額蘇松諸郡折糧銀爲里豪所侵者七十五萬兩  
有奇俊往徵之不數月悉輸納內帑尚書金濂大咨異之俾典  
闔部章奏自是吏景泰以至天順歷任員外郎郎中職皆嚴辦  
而賢能之聲日益至辛巳 朝廷出師征兩廣叛寇 命往督  
饋餉時郡邑殘破公私匱乏百方籌畫事克有濟大率如弛鹽  
商越境之禁俾隨處貿易而每引輸粟二斗於南雄梧州用是

兵不乏食而民不出賦輿論稱之是冬母喪乞守制不許明年  
師還始歸莆總兵監軍合百金爲賻却之又明年復任成化元  
年陞南京太常少卿先是爲少卿者多不檢一祠官缺請托紛  
然俊至僉舉之遂帖服蓋其務甚閒而俊任之嘗不勞餘力識  
者固已知非久處之地矣四年召爲戶部右侍郎時尚書楊鼎  
以剛悍自任不假貸於僚佐然獨重俊事經俊斷制者卽不復  
省屬時四方奏災異三邊告輸輓文移沓雜諮議旁午裁決如  
流不淹晷刻而靡不曲當人咸服不可及辛卯京師饑俊奉

勅發太倉粟一百萬斛減價糶以利民權貴有乘時射利者俊請  
於上凡糶以升斗計滿一石者閉不與其計遂沮而眞饑者

獲濟壬辰 上命將北征特 勅總督軍餉於秦晉諸邊俊倅  
道疾馳比至則邊庾空竭歲且不登芻粟價湧而榆林延綏糧  
道險遠輸者病之俊乃發金於內郡市易且修西安韓城同官  
徑道以便飛輓而行所向無敵虜酋授首勞伐居多凱旋加俸  
一階九年遷吏部右侍郎十一年轉左銓綜人物號爲清允十  
三年滿九載陞南京戶部尚書十六年奉 勅改兵部叅贊機  
務剷除宿弊益不動聲色而事皆就緒人稱爲名德老成二十  
年改南京吏部尚書二十二年加太子少保致仕弘治元年以  
疾卒於家謚康懿俊爲人沉毅簡重淵澄山峙望而知爲正人  
平居篤孝友寡言笑操履端方確乎不可拔旣仕以清白自持



雖位至六卿蕭然不異布衣時故世多敬服其介云

儲柴墟云公自登科筮仕敷歷兩京致位通顯凡政事之大者禮樂銓選兵戎錢穀或副或專公無不與奮力奏功蓋四十年矣而天下之士不以此稱頌於公究公之心亦不以此自居也至於論列今之大臣清修愼重坐於廟堂不動聲色足以坐鎮雅俗標榜後進負德望知大體者必首及於公焉蓋非一人之私言也

王與字廷貴直隸常州府武進縣人生有異質十歲能作詩十五攻舉子業二十爲學生正統甲子領鄉薦景泰辛未舉禮部賜進士及第第三人授翰林院編修被旨偕修撰柯潛教庶吉

士吳滙等二十八人肄業東閣給酒饌及膏燭費 賜御府諸  
書癸酉夏旱代祠東嶽甘雨隨注甲戌丁外艱喪葬如禮天順  
丁丑仍舊任庚辰同考禮部會試時稱得人尋侍 東宮講讀  
辛巳年預修大明一統志成 賜金帛癸未復同考禮部遷侍  
講甲申 憲宗踐祚以待從 恩擢左春坊左庶子仍舊職  
勅充經筵講官敷析明暢啓沃良多修 英廟實錄分掌禮館成  
化乙酉改南京翰林院學士至則迎母就養丁亥實錄成以舊  
勞預賜戊子以母喪歸辛卯服闋適南京祭酒缺 朝廷特用  
薦起於家俱嚴督率明賞罰公差遣奏設看倉斗級九年幼典  
簿楊傑貪污黜之議收支錢糧委廉謹屬官公同典簿收支俱

從之十一年立監生丁憂復班加丁法每坐堂三日加一日以杜告擾十二年奏依北監例減歷十三年攢造精微文簿數有祖父母與父及嫡繼親養等母以防加丁告擾十四年奏副榜舉人不願就職許入監讀書依親復班照丁憂例撥歷及免寄養官豕三事從之十五年編輯本監條例上奏論便宜數事又修廟宇學舍補刻書板建書庫門工悉就緒壬寅滿九載進南京吏部左侍郎時吏弊滋甚每差撥則呼爭於庭乃按舊式參以時宜著爲定規羣吏懾服丁未召爲戶部左侍郎乘傳赴闕甫數月 孝廟登極遷南京戶部尚書復改南京吏部會有旨考察諸司僉悉心諏訪務求至當有小過而才亦可用者別有

奏請得降級補外其以例考績者必斟酌殿最不苟爲文  
陳八事多見采納弘治癸丑年七十上疏乞致仕 上優語  
留再上亦如之甲寅以再考去任還家臥疾乙卯春復上疏詞  
益懇 特進階榮祿大夫致仕 命有司給廩米二石歲給輿  
隸四人比得報疾已篤越二日卒壽七十有二贈太子太保謚  
文肅與風采凝峻廉角峭厲克制操執不爲俗變性孝友言動  
不苟雖負才望而謙抑不自矜嘗念宗族貧窶歲給廩粟憫兄  
子澄之孤以三品恩移贍爲國子生又修世譜輯家乘以貽子  
孫尤重義氣嘗得楊氏別業有祖隴在欲徙之他乃歎曰彼以  
全產售人而不能保此三尺吾不忍也不允其徙闕其垣使四

時祭掃焉性警敏精練剴繁理劇不勞而集彭文憲愼許可獨  
器重之後雖秩位隆高而識者以爲弗盡其用也其爲文雅健  
有體裁詩亦清粹真行書皆遒脫俗所著有思軒稿朝天稿  
若干卷藏於家

張悅字時敏直隸華亭縣人天順庚辰進士自少凝靜持重初  
授刑部主事歷員外郎奉職守法以不欺爲本時朝士有囑其  
所親者曰不敢撓公法但乞假一詞使知某嘗有言耳訖事而  
問之曰其人無大罪旣據法施之矣敢僞言以市恩聞者歎服  
久之陞江西僉事持大體不事苛察陞浙江提學副使始以糊  
名校士尋去之曰我且自疑人誰信我請託覬覦屹不爲動而

士皆帖服無敢以私干者所獎拔或出新進往往取魁甲爲聞  
人衆神其明而莫測其所爲用成化十四年陞四川副使十五  
年陞湖廣按察使甲辰朝 覲時中官尚銘在東廠任事衆羣  
趨其門悅獨不往銘銜之伺察無所得未幾銘敗而其名益彰  
成化二十二年歷都察院右僉都御史二十三年陞工部右侍  
郎 孝廟嗣登大位在朝大臣相率上疏求去位悅不可曰更  
新之始正當竭忠報國豈可以去言耶弘治元年遷禮部二年  
再遷吏部右侍郎五年轉左癸丑大旱上陳遵舊章卹小民崇  
儉素裁冗食禁濫罰數條并修德圖治二疏皆嘉納之時在吏  
部尚書王恕負時望尤倚信於悅凡有言無弗從嘗兩攝選衆

議翕然稱允六年陞南院右都御史持厲風紀臺中肅然八年陞南京吏部尚書鎮定簡靜上下安之雖中官亦加敬禮守備太監陳祖生嘗設席獨延賓上位子弟問更召何人曰他人豈可同此席其爲時所重如此九年改南京兵部尚書叅贊機務詳見南京兵部

倪岳字舜咨應天府上元縣人天順甲申登進士入翰林爲庶吉授編修預修英宗實錄秩滿遷侍讀選充經筵講官被命編輯文華大訓書成進翰林學士選侍皇太子講讀遂拜禮部右侍郎仍充經筵講官孝宗初卽位言者全集皆下禮部議擬多出岳手弘治九年知貢舉防範嚴密如帖圖編號

每因舊法出新意後遂不可易本年改南京吏部尚書加太子少保時議不宜處之散地及考覈在京諸司岳於南畿所黜凡若干人衆稱明允十二年春三月因災異率九卿陳言二十八事多見施行本年改南京兵部尚書叅贊守備歷吏部尚書詳北吏部

秦民悅字崇化直隸廬州府舒城縣人天順丁丑進士授行人司行人歷工部屯田司員外郎成化十年陞廣州府知府政出公平而百廢修舉士民宜之民立生祠求大學士劉翊紀其政績祀之陞江西右叅政歷三載陞右布政弘治三年轉左民悅在江西凡三任察民情最深敷政多從寬恕不尚嚴苛四年陞



都察院右副都御史巡撫順天地方整飭薊州兵備未幾召爲  
戶部右侍郎提督倉場六年回理部事七年改吏部丁憂十年  
起復改左副都御史協理院事十一年復吏部右侍郎十二年  
陞南京吏部尚書初官留都給假者紛紛值監丞楊文具告給  
假回籍省祭遷葬養病民悅駁問一狀之內四事並告難以施  
行且嚴禁之於是其風稍息十三年陞南京兵部尚書叅贊機  
務詳南京戶部

林瀚字亨大福建福州府閩縣人成化丙戌進士改庶吉士接  
丁父母憂八年授翰林院編修十三年陞修撰二十二年陞左  
春坊左諭德仍兼前職弘治三年太宰王恕薦瀚學行淳正陞

國子祭酒十二年改吏部右侍郎尋轉左與太宰同心掄才務求至公十三年陞南京吏部尚書鎮定不搖人倚爲重正德改元時冢宰缺人給事中丘俊御史石玠交章薦其學優才瞻臨事公正剛方素著廉介久聞宜居其位未幾改南京兵部尚書叅贊機務詳南京兵部

楊守卬字惟立別號碧川浙江寧波府鄞縣人母張淑人孕甫八月夢大星輝輝於庭覺而生幼警敏六歲受業於栖芸先生教以經傳卽通大義十五從宦泉州爲古詩文迺出時輩景泰辛未以父喪歸得取正於其兄吏侍守陳學益邃補郡庠生願受業者踵相接成化乙酉舉浙江鄉試第一明年會試三場畢

聞張淑人遘疾馳歸省侍疾愈卒業大學會祭酒邢讓等三人  
爲怨家所傾坐昧繫獄乃草奏率六館士伏闕訟其冤至再  
事雖不自識者建之戊戌會試得易魁第四 廷試賜進士及  
第第二人授翰林院編修辛丑充廷試彌封官 賜寶鏹丁未  
滿九載時江西李孜省以左道干紀與從兄工部尚書守隨素  
不相能旣中傷之併出守陞爲南京翰林院侍讀至則署院事  
時守陳方署事翰林士論以兄弟俱發解又南北分典詞垣爲  
斯文盛事弘治改元戊申 孝宗御極召還翰林纂修 憲廟  
實錄歷涉六館紀載時事評隲人物去取予奪極精當已酉充  
經筵官敷對明暢義歸於正且極言進君子退小人爲治亂之機

言甚激切 孝宗改容聽之辛亥 實錄成擢左春坊左諭德  
賜白金文綺病士習浮靡文氣日入於弊其同考禮闈主應天順  
天鄉試俱務黜浮崇渾時稱得人丙辰署翰林院事預修 玉  
牒尋進翰林院學士奉 詔授庶吉士業會吏部都察院考察  
翰林官屬去留協輿論丁巳充纂修 大明會典副總裁戊午  
武宗春官出閣講學充侍班官己未遷南京吏部右侍郎奉 詔  
各舉所知以郎中陳鏞評事王紀上後皆不負所舉署兵部以  
星變陳五事皆切時弊 朝廷嘉納辛酉南監祭酒病卒諸生  
乘隙多易簿書以規速進及往署監事悉爲釐正而亦不究作  
過者滿三載先期請得便道燎黃於墓 報可歸鄞壬戌春請

闕考績內閣以會典修久未完守陞精於史事奏留校閱與鮑菴  
吳公同事勘訂精密居五月書成 賜宴禮部請還任許之錄  
校閱功遷左侍郎食正二品祿 賜寶鑑羊酒甲子考察南京  
諸司官屬去取當乎人心乙丑上疏乞休不俟 命而歸旣得  
旨進本部尚書致仕後逆瑾竊柄素憎正類矯 詔奪所加秩璫  
誅復之性孝友天至與兄守陳恩義如師弟子及謝世爲位於  
室朝夕哭奠目爲之昏輯其遺文梓之以傳守隨以瑾誣繫獄  
又罰出米數百石輸邊乃罄所積爲助以產償之不受於書無  
所不讀而必以六經四書爲之宗其學不專事文藝敦大本勵  
行檢精思力踐期於深造其誨子弟誨生徒皆率是道居常端

重簡默與人論說義理則色溫氣和聽者忘倦至其善善惡惡確有定見羣莫能奪比致仕家居凡可及民言於所司賑荒蠲稅停無益之作陰受其惠者多爲文平正典實詩冲澹雋永意到卽成不爲纖新豔麗語所著有集程朱義論碧川文抄二十九卷困學寡聞錄十卷雜文儲稿又若干卷詩二十卷一日書數語於遺稿曰學文師韓吏部學道師程伊川官同吏部二品壽過伊川二年文章可得而聞望道而木之見困學勉行老而不倦守正疾邪至死不變五日卒壽七十有七贈太子少保

李傑字世賢直隸蘇州府常熟縣人成化丙戌進士選庶吉士四年授編修十三年轉侍讀乙巳充東宮講讀官二十一年

進侍讀學士弘治元年遷左庶子仍兼前職四年辛亥陞南京  
國子祭酒本年守制八年服闋改太常寺卿兼侍讀學士掌院  
事十三年庚申擢南京禮部侍郎十五年改禮部十六年轉左  
正德紀元預修 孝廟實錄充副總裁大學士焦芳擅竄國史  
傑亦莫如之何二年書成陞南京吏部尚書本年調禮部詳禮  
部

黃珣字廷璽浙江紹興府餘姚縣人孕十四月而生聰慧絕人  
讀書過目輒成誦年二十三舉成化辛卯鄉試第一人越辛丑  
廷試第一甲第二人授翰林院編修二十一年丁外艱服闋當弘  
治改元與修 憲廟實錄二年充 經筵官是歲書成陞本院

侍講 賜宴及白金文綺四年充 經筵講官丙辰分典會試  
文衡適大學司業缺進右春坊右諭德管司業事辛酉陞南京  
祭酒未任丁繼母韓夫人憂 孝宗念經幄舊臣 特遣官爲  
營葬事及諭祭十七年釋吉復任補國子祭酒以 恩例賜四  
品 誥命明年陞南京吏部右侍郎正德二年陞本部尚書旣  
而逆瑾以私憾之遂致仕九年卒於家年七十有七贈太子少  
保蔭其子一人珣爲人簡易厚重忠實之性出於自然凡 經  
筵進講於前代理亂興衰之事必反復深陳之冀以感悟 天  
衷會試所選拔皆天下知名士掌南北太學爲之振頽起廢百  
度具舉養諸生恩義兼至有山西人魏成者家貧不能歸止一



女已聘許人欲改聘同舍生以資途費珣廉知卽撥門差以濟之其餘或病給以藥或死無所歸爲之殯殮者甚夥故一時上翕然感頌之又斥其公餘銀若干繕理號舍完輯公廨正德改元時爲少宰卽偕冢宰三山林瀚條六事以裨新政頗見采納其爲詩文典雅平澹如其爲人所著有紛紛論稿惕齋稿東山文集素菴詩集藏於家

王華字德輝浙江紹興府餘姚縣人別號實菴晚復號海日翁嘗讀書龍泉山寺中故學者稱爲龍山先生正統丙寅九月甲午生先夕孟淑人夢其姑趙抱一童子緋衣玉帶授之曰新婦平日事吾孝今孫婦事汝亦孝吾與若祖丐於上帝以此孫畀

汝俾汝子孫世世榮華無替故生而以今名其長兄半巖先生以榮名夢故也幼警敏絕人始能言大父槐里先生抱弄之因口授以古詩經耳輒成誦稍長便讀書過目不忘六歲時與羣兒戲水濱見一客來濯足已大醉遺其所提囊而去取視之數十金也華度其人酒醒必復來恐人持金去以投於水中坐守之飯頃其人果號泣而至乃迎謂曰求爾金耶爲指其處其人喜躍以一金分餽笑却之曰不取數十金乃取爾一金乎客且慚且謝隨至其家無少長咸遍拜之而去岑大夫人嘗績窓下華從傍讀書時邑中迎春里兒皆迎呼出觀華獨安坐讀書不輟太夫人謂之曰若亦暫往觀乎答曰夫人誤矣觀春何若

觀書太夫人喜曰兒是也吾言誤矣年十一從里師錢希寵學初習對句月餘習詩又兩月餘習文數月之後而同學中諸生盡出其下錢歎異之曰歲終吾無以教爾矣縣令呵從到塾同學皆廢業擁觀華乃據案朗誦若無覩錢奇之戲謂曰爾獨不顧令卽謂爾倨傲呵責及爾且奈何答曰令亦人耳視之奚爲若誦書不輟恐彼亦難便呵責也錢因語父竹軒公曰公子德器如是斷非凡兒十四歲時嘗與親朋數人讀書邑中龍泉山寺舊有妖爲祟數人者皆富家子弟素豪俠自負莫之信又多侵侮僧寺僧甚苦之信宿妖作數人果有傷者寺僧因復張皇其事衆皆失氣狼狽走歸華獨留居如常妖亦遂止僧咸以爲

異謀假妖試之每夜分輒登屋號嘯或又投瓦石撼臥榻或乘風雨雷電之夕奮擊門障僧從壁隙中窺之方檠燈端坐神氣自若輒又私相歎異然益欲多方試之月餘技殫因至所居從客問曰向妖爲祟諸人皆被傷君能獨無恐乎答曰吾何恐僧曰諸人去後君復有所見乎答曰吾何見僧曰此妖但觸犯之無得遂已者君安得獨無所見乎華笑曰吾見數沙彌爲祟耳諸僧相顧色動疑覺其事因佯謂曰此豈吾寺中亡過諸師兄爲祟耶華笑曰非亡過諸師兄乃見在諸師弟耳僧曰君豈親見吾儕爲之但臆說耳華曰吾雖非親見若非爾輩親爲何以知吾之必有見也耶寺僧因具言其情且笑且謝曰吾儕實欲

以此試君耳君天人也異時福德何可量至今寺僧猶傳其事  
天順壬午年十七以三禮投試邑中邑令奇其文後數月復特  
試之題下一揮而就令疑其偶遇宿構連三命題其應益捷因  
大奇賞謂曰吾子異時必大魁天下於是隱然名動遠邇爭禮  
聘爲子弟師提學松江張悅考校姚士以華與木齋謝遷爲首  
並稱之曰二子皆當狀元及第福德不可量也方伯祁陽竇良  
擇師於張張曰但求舉業高等則如某某者皆可必欲學行兼  
超惟有王其耳時甫踰弱冠竇親至館舍講賓主之禮請爲其  
子師延至祁陽時郢湘之士翕然來從者以數十在祁居方伯  
之梅庄別墅墅中積書數千卷晝夜諷誦其間足跡不入城市

者三年永士有陳姓者聞其篤學特至梅庄請益間取所積書叩之皆默誦如流陳歎曰昔聞五經笥今乃見之祁俗好妓飲乃峻絕之未嘗與比告歸祁士以華客居三年矣欲試之乃秘兩妓於水中亭因餞於亭止宿焉客散妓從秘中出華呼舟不得撤門爲桴而渡衆始歎服其難始在梅庄嘗一夕夢迎春歸其家前後鼓吹旛節中導白土牛其後一人輿以從則方伯杜謙也旣覺以竹軒公岑大夫人皆生於辛丑謂白爲凶色心惡之遂語諸生欲歸諸生堅留之寧生曰以絃占是夢先生且大魁天下矣夫半丑屬也謂之一元大武辛金屬其色白春者一歲之首也世以狀元爲春元先生之登其在辛丑乎故事送狀

元歸第者京兆尹也其時杜公殆爲京兆平辭歸舟過洞庭阻  
風君山祠下因入祠謁祝者迎問曰公豈王狀元耶華曰爾何  
從知之祝者曰疇昔之夕夢山神曰後日薄暮有王狀元來吾  
以是知之華異其言與梅庄之夢適相協因備紀其事自是連  
舉不利至成化庚子始發解明年辛丑果狀元及第杜謙爲京  
兆悉如其占云是歲授官翰林院修撰甲辰 廷試進士爲彌  
封官丁未充會試同考官弘治改元與修 憲廟實錄充 經  
筵官乙酉秩滿九載當遷開竹軒疾卽移病不出當道使人來  
趣親友亦交勸之且出遷官若凶聞果至不出未晚也客曰親  
有疾已不能匍匐歸侍湯藥又忍逐逐奔走爲遷官之圖須家

信至幸而無恙出豈遂晚乎竟不出庚戌正月下旬竹軒之計  
始至號慟屢絕卽日南奔葬竹軒於穴湖山遂廬墓下墓故虎  
穴虎時時羣至獨晝夜哭其傍若無覩者久之益馴或傍廬臥  
人畜一不犯人以爲異癸丑服滿陞右春坊右諭德充 經筵  
講官嘗進勸學疏其略謂學貴緝熙於光明今每歲經筵不過  
三四御而日講之設或間旬月而始一二行則緝熙之功無乃  
亦有間歟雖 聖德天健自能乾乾不息而宋儒程頤所謂涵  
養本原薰陶德性者必接賢士大夫之時多而後可免於一暴  
十寒之患也 上然其言自是御講日數丙辰三月 特命爲  
日講官賜金帶四品服四月以選正人端國本公卿會舉爲



東宮輔導戊午三月又命兼東宮講讀於是眷賜日隆是歲奉命主順天府鄉試辛酉主應天鄉試壬戌陞翰林院學士從四品尋奉命教庶吉士魯鐸等繼又命纂修大明會典踰年書成陞詹事府少詹事兼翰林院學士五月復命與編通鑑纂要六月陞禮部右侍郎仍兼日講上以華講釋明瞻故特久任是歲冬命祭江淮諸神乞便道歸省還朝以岑太夫人年邁屢上疏乞休以便色養上不允尋陞禮部左侍郎明年武宗皇帝改元賊瑾用事呼吸成禍福士大夫奔走其門者如市華獨不之顧時元子封新建伯大司馬守仁方爲兵部主事上疏論瑾罪惡瑾大怒旣逐新建復移怒於華

然瑾微時嘗從鄉人方習書史備聞其平日處家孝友忠信之詳心敬慕之怒稍解嘗謂人語於華若一見內閣之位可立躋華不行瑾意漸拂丁卯正月遂陞南京吏部尚書瑾猶以舊故使人慰言不久將召用冀必往謝又不行瑾復怒遂推尋禮部時舊事本無干者傳旨令致仕聞命忻然束裝而歸曰吾自此可免於禍矣既有以同年友事誣毀於朝廷者人咸勸其一白答曰某吾同年友若白之是我訐其友矣是焉能免我哉竟不辯後新建復官京師聞士夫之論以是爲不平復具本奏辯其事既馳書責止之曰汝以是爲吾平生之大恥乎吾本無可恥今乃無故而攻發其友之陰私是反爲吾求一大

恥矣人謂汝智於吾吾不信也於是遂止不復辯華歷事三朝  
惟孝宗最知末年尤爲眷注屢因進講勸上勤聖學戒逸  
豫親仁賢遠邪佞上皆虛心嘉納故事講官教人當直者必  
先期演習至上前猶或整張失措華未嘗豫習及講又特條  
暢一日上已幸講筵直講者忽風眩作仆地衆皆皇遽共推  
代乃從容就案展卷敷析尤極整暇衆咸心服其器度內侍李  
廣者方貴幸嘗於文華殿講大學衍義至唐李輔國與張后  
表裏用事事諸學士欲諱不敢言乃特誦說朗然開諷明切左  
右聞者皆縮頸吐舌而上樂聞不厭明日罷講命中官賜  
食中官密語云連日先生講書明白聖心甚喜甚加眷念華

自慶知遇益用剴切 上亦精勤彌厲詎意 孝廟升遐志未  
及行亦偃蹇而歸矣華氣質醇厚平生無矯言飾行仁恕坦直  
不立邊幅與人無衆寡小大待之如一談笑言議由衷而發廣  
庭之論人對妻孥曾無兩語人有片善稱之不容口有難急來  
控者惻然若身陷於溝穽忘已拯救之雖以此招謗亦不恤然  
於人有過惡亦直言規切不肯少回曲以是往往反遭嫉忌然  
人亦知其實心無他則亦無有深怨之者其才識宏達無所不  
可而操持堅的屹不可動百務紛沓應之沛然未嘗見其有難  
處之事至臨危疑震蕩衆多披靡惶惑而毅然卓立然未嘗以  
此自表見故人之知者罕矣爲詩文皆信筆立就不事雕刻但

取詞達而止所著有龍山稿垣南草堂稿禮經大義諸書雜錄  
進講餘抄等稿共四百六卷孝友出於天性自得祿食盈餘皆  
與諸昆弟共之視諸昆弟之子不啻已出事竹軒公及岑太夫  
人色愛之養無所不至太夫人已百歲華亦壽踰七十矣朝夕  
爲童子之色嬉戲左右撫摩扶掖未嘗少離或時爲親朋山水  
之邀乘舟暫出忽念太夫人感然返棹及太夫人歿寢苦蔬食  
哀毀踰節因以得疾逮葬跣足隨號行數里於是疾勢愈增病  
臥踰年始漸瘳然自是氣益衰又素聞寧濠之惡疑其必爲訛  
嘗私謂所親曰異時天下之禍必自茲人始矣令家人以地於  
上虞之龍溪使其族人之居溪傍者買田築室潛爲柁櫓之計

至是正德己卯寧濠果發兵爲變遠近傳聞駭愕且謂新建公亦已遇害盡室驚惶請徙龍溪華曰吾往歲爲龍溪之上以有老母在耳今老母已入土使吾兒果不幸遇害吾何所逃於天地乎飭家人勿輕動已而新建起兵之檄至親朋皆來賀益勸宜速避龍溪咸謂新建旣與濠爲敵其勢必陰使奸人來不利於公乃笑曰吾兒能棄家殺賊吾乃獨先去以爲民望乎祖宗德澤布於天下天必不使殘賊覆亂宗國行見其敗也吾爲國大臣恨已老不能荷戈首敵儻不幸勝負之算不可期猶將與鄉里子弟共守此城耳因使人趣郡縣宜急調兵糧且禁訛言勿令搖動鄉人來竊視方晏然如平居亦皆稍稍復定不旬

月新建捷報至果如所料親朋皆携酒交慶華曰此祖宗深仁厚澤漸漬人心紀綱法度維持周密朝廷威靈震輯四海蒼生不當羅此荼毒故旬月之間罪人斯得皆天意也豈吾兒一書生所能辦此哉然吾以垂盡之年幸免委填溝中家門無夷戮之慘鄉里子弟又皆得免於征輸調發吾兒幸全首領父子相見有日凡此皆足以稍慰目前者也諸親友咸喜極盡歡而罷已而武廟南巡奸黨害新建之功飛語構陷危疑洶洶旦夕不可測羣小偵伺旁午於道或來家私籍其產宇丁畜若將抄沒之爲姻族皆震撼莫知所出華寂無聞日休休田野間惟戒家人謹出入慎言語而已世廟龍飛始下詔宣白新建

之功 召還京師新建因得便道歸省尋進南京兵部尚書封  
新建伯 遣行人齎白金文綺慰勞新建下 溫旨存問於家  
兼有羊酒之賜適華誕辰親朋咸集新建捧觴爲壽乃感然曰  
吾父子不相見者幾年矣始如平寇南贛日夜勞瘁吾雖憂汝  
之疾然臣職宜爾不敢爲汝憂也寧濠之變皆以汝爲死矣而  
不死皆以事爲難平矣而卒平吾雖幸汝之成然實天意非人  
力可及吾不敢爲汝幸也讒構朋興禍機四發前後二年岌乎  
知不免矣人皆爲汝危吾能無危乎然於此時惟有致命遂志  
而動心忍性不爲無益雖爲汝危又復爲汝喜也 天開日月  
顯忠遂良穹官高爵濫冒封賞父子復相見於一堂人皆以爲



榮吾謂非榮乎然盛者衰之始福者禍之基雖以爲榮又復以爲懼也夫知足不辱知止不殆吾老矣得父子相保於牖下孰與犯盈滿之戒覆成功而毀令名者耶新建跣而跽曰大人之教兒所日夜切心者也聞者皆歎息感動於是會其鄉黨親友置酒燕樂者月餘歲且暮疾復作壬午月終於正寢年七十七臨絕神識精明略無昏憤時 朝廷推論新建之功進封華及竹軒槐里皆新建伯是日部咨適至屬疾且革聞使者已在門促新建及諸弟曰雖倉遽烏可以廢禮爾輩必出迎問已成禮然後偃然瞑目而逝始致政歸客有以神仙之術來說者謝之曰人所以樂生於天地之間以內有父母昆弟妻子之親外有

君臣朋友姻戚之懿從遊聚處無相離也人皆去此而稿然獨  
往於深山絕谷此與死者何異夫清心寡慾以怡神定志此聖  
賢之學所自有吾但安常委順聽盡於天而已奚以長生爲乎  
客謝曰神仙之學正謂世人悅生惡死故因其所欲而漸次導  
之今公已無惡死悅生之心固已默契神仙之妙吾術無所用  
矣旣歸卽息意丘園或時與田夫野老同遊共談笑蕭然形跡  
之外人有勸之宜且閉門養重者笑曰汝豈欲吾更求作好官  
邪性善節儉然於貨利得喪曾不以介意嘗構樓居十數楹甫  
成而火質積爲一蕩時親友來救焚者皆一一從容接談衍衍  
如平時略不見有倉遽之色人以是咸歎服其德量云

劉忠字司直河南開封府陳留縣人成化戊戌進士授翰林院編修在翰林歷侍講幾三紀始拜侍講學士十八年進翰林學士正德二年爲講官陞南京禮部右侍郎已中貴人知其高節進本部尚書本年陞南京吏部尚書少師焦芳亟薦其賢瑾傳旨改吏部兼翰林學士掌詹事入內閣詳內閣

梁儲字叔厚廣東廣州府順德縣人成化戊戌進士改庶吉士授翰林編修歷侍講司經局洗馬進翰林學士弘治十六年陞詹事府少詹事仍兼學士本年陞吏部右侍郎正德元年轉左二年命兼學士修孝宗實錄及修大明會典俱爲副總裁尋進吏部尚書仍兼學士掌詹事府事管內閣誥勅三年止掌

府事尋命同少傅王鏊爲會試考試官四年爲修會典降吏部  
右侍郎本年十月復前職十二月改南京吏部尚書五年召  
入內閣詳內閣

張濬字仲澗廣西桂林府全州人成化戊戌成進士選庶吉士授  
翰林院編修弘治己酉轉侍講戊午充東宮講讀官辛酉主  
考順天鄉試十二年進侍讀學士十八年陞學士尋選國子監  
祭酒正德元年擢禮部右侍郎二年轉左己巳陟南京禮部尚  
書本年改南京戶部六年改南京吏部尚書時儲位久虛濬  
率同儕請建太子言甚剴切甲戌改南京兵部叅替機務餘詳  
南兵部

孫需字孚吉江西饒州府德興縣人成化辛卯領鄉薦第二人  
時巡按御史蒙城石確奇其文欲置解首而藩臬有欲拔其所  
厚者以石治易詭言此士治易誠宜首選石引嫌而藩臬所厚  
者遂先需石謂此士名第今雖小屈明年甲榜恐解首未能或  
之先也需果以明年壬辰遂登進士第筮仕爲常州府推官常  
俗富侈訟輒恃賄取勝需遠嫌自潔勤於訊鞠惟公惟明隱奸  
宿寃摘決無所漏能聲驟起巡撫平倭重之凡獄之難決者率  
以屬之及經聽斷無不屈服運河淤塞撫按議取徑別鑿一河  
初委地方官延久緒弗就及屬需督理相地賦役約先完有賞  
民踴躍趨事不旬月而工告成三年例當奏課平倭疏留治事

不得行又三年爲成化戊戌 召入授南京四川道監察御史  
風裁凜凜留都皆嚴憚之遇事必極言無所諱避妖僧以左道  
蠱 憲朝率同列斥其罪請誅之雖遭筆未嘗以爲悔嘗奉命  
巡倉至中都鎮守中官欲謁者由旁門入且以文東武西榜於  
門需不入僅投一刺將據其所榜以僭劾之中官憚需嚴卒正  
主客之禮於是王端毅恕方叅留務最慎許可輒造需加禮江  
盜熾需巡江以略授耆民張禮捕獲幾百人有贓七十簍卽令  
錦衣衛同事簡千戶識以印緘送之官奏禮爲巡檢專捕盜賊  
事自是江道寧帖簡嘗對衆歎需之廉曰盜賊無籍使孫盡七  
十簍取之固無知者而公不欺乃爾何可及耶廉聲由此益著

未幾陞四川按察司副使南臺陞副使蓋自需始前此所未有也既蒞任會憲長缺遂署其事公務弗給率捐已俸給之略無難色按部治猾豪決淹獄明而不苛所在奔赴賊吏或望風解印綬去比歸所得紙劄價值輸之公無毫髮私入屬有素以簡伉聞者如御史陳瑤以勢凌轢二司獨於需曲加禮敬又以公廉嚴愼克振風紀薦之歲侵糴貴民死過半湖廣倉粟頗多言於撫按偕叅議金澤兼程往貸得三十萬石而西分地賑給所全活甚衆蜀人感之咸曰微孫公吾皆爲道殣矣時歷兩考當課巡撫都御史丘鼐疏留視事蓋在蜀已餘七年吏部推陞者五邑人有不悅需者譖於時宰久乃不遷而需未嘗意動尋以

憂歸故事藩臬舟行以瞿塘濫湏之險命有司縛筏翼之至荊  
州市其竹木可數百金需不欲歛民罔利竟拒不用亦竟無他  
虞終喪改湖廣未上擢浙江按察使遇大獄必加覆審未嘗輕  
決小吏苟無大過必保全扶植之臺使薦賢監司者必首及弘  
治庚申陞浙江左布政使浙財賦之淵需志避嫌謗出納皆委  
諸人公堂諸宿弊釐革殆盡吏無所售其奸民謠有前劉後孫  
清德著聞之語蓋以需可繼大司馬東山之躅也入 覲例僉  
水手取銀爲里道費朝士之贊亦取辦焉需峻拒贊率從簡論  
者賢之第治行又居首及還浙未浹旬擢都察院右副都御史  
巡撫河南時河溢且囑汴城民流移載道乃議使役以築堤而



予之傭錢令出趨者萬計隄成而饑復濟公私便之羣盜橫行  
命督兵擒捕先後獲數十人復取其贓散州縣以充給濟之費  
他若讞獄平賊鋤強植弱孳孳在念民所便不便皆以次行罷  
無遺弘治癸亥 駕帖下河南取牡丹三千上疏耳目之玩不  
可勞民沁陽縣知縣馮憲忤宗藩已有 旨下撫按官會訊尋  
復逮赴詔獄又疏令如反汗如戾舊法 孝廟皆納其言而寢  
之居三年屬吏競勸民視如父母然鎮守中官劉瑯與需水火  
剝民自殖輒以法裁之有奸民違例赴瑯投愬牒者必據法配  
之荒裔瑯嘗跪請於需曰瑯不能學公之公廉盍稍縱繩墨使  
瑯得飲勺水以相安於此邪需心知瑯必害已亦不爲較日夜

陰圖中需大臣之子有怙勢橫於其鄉者需亦裁以法於是瑯  
計得行會陝西巡撫缺遂調往補蓋大臣亦不欲久於汴也及  
去汴汴人遮道扳留呼天而號曰何以爲我奪公而他畀也至  
陝西經略武備拊循士卒取權貴所私役復之舊伍他省有輸  
粟助邊者皆令躬自輦送無苦邊氓聞虜警則以義激將士腎  
之先驅而亦擐甲從之不以勞避緣由項領爲風寒所襲而病  
遂乞休 詔不允乃召還京去陝陝人攀號如去汴之日道彰  
守以銅雀硯贈亦弗納寓館陶堅臥不起累以疏辭時 孝廟  
方命侍郎何鑑稽覆荆襄流民而鄖陽其淵藪也乃改命撫治  
至則以文告諭之願爲編氓者給牛種俾有常業願歸故里者

給餼遣還籍管內所得逋逃蓋數萬餘口又以教化爲撫民急務乃興建學舍擇秀民聚講其中有暇則親往課之未幾士習丕變應試者倍於曩昔武當境內先是國家諸祈禱費皆民出需曰山有香錢鉅萬典守者私之是可取爲享神之用也令有司籍記悉貯均州於是祈禱之費不擾於民矣耶人謂前此撫治未有如需之精密者正德丁卯陞南京兵部右侍郎過安陸謁恭穆獻皇帝賜宴有厚賞辭不敢受帝益賢之比至留都值榮王之國過金陵欲登城一覽形勢需謂法不敢登乃止已巳陞南京禮部尚書時逆瑾專權柄陞者多以賄謝需方坐崇之累罰輸邊米數百石未數月矯旨令致仕歸歸則

故居已燬幾無以生需處之裕如也庚午瑾敗復用薦起爲南京工部尚書務整宿弊不欲以浮冗多耗民財先是諸營建給領料價率匠魁專之蒞部事者或與爲市故羣匠無所得而工不可速完需仍令匠魁及羣匠同領而均分之稱便如一口出歲省冗費萬金癸酉冬改南京刑部尚書諸司獄必親筆削處讞皆審慎人無冤稱甲戌夏考最遂改南京吏部尚書留都務簡表以廉靜諸司翕然明年奉命考察庶官諸所存黜叅之公論無毫髮私徇其黜者止坐微罪不忍以太甚斥或曰如此則彼將不服且得藉口自文需曰吾斬服彼之心苟公矣他何慮也蓋所黜數人頗有時望聞者始而疑焉旣而廉之果當黜

於是益服其明戊寅疏修政弭災戒遊畋抑權倖諸事以年及  
遂懇辭獲允仰乘傳歸 命有司給廩粟月一石與隸歲二人  
既歸創屋數楹摘 勅中兩全二字以名之里居自守益嚴於  
州縣無所干謁嘗出乘少一卒子姪欲詣縣索之需不可曰  
上賜我興隸將何爲而又煩有司別給耶其一介不苟取類此卒  
贈太子太保謚清節

劉春字仁仲四川巴縣人成化丁未進士授編修弘治辛亥轉  
修撰庚申遷左諭德癸亥進侍講學士正德初陞學士丁卯命  
掌院事戊辰命教庶吉士邵銳等四月開武舉充考試官其條  
格皆創爲之最稱折衷武舉有錄自此始丁外艱辛未服滿陞

吏部右侍郎本年轉左壬申以閣薦命不妨部事充 經筵日  
講癸酉陞禮部尚書 賜玉帶乙亥尋丁內艱以講讀勞 誥  
贈二代賜祭葬戊寅服除卽其家改南京吏部疏辭不允辛巳  
改禮部尚書兼學士管內閣 誥勅五月命掌詹事府事

廖玘字



直隸東光縣人弘治庚戌進士五年授吏部考功

司主事丁憂十六年補稽勲司十七年陞稽勲員外十八年改  
文選正德元年養病二年補考功三年改文選四年陞文選郎  
中本年陞太僕寺少卿七年陞提督四夷館太常寺卿改太常  
寺十一年陞工部右侍郎督理山廠十二年陞吏部右侍郎十  
四年轉左十六年陞南京吏部尚書嘉靖元年改南京兵部詳

兵部

羅欽順字允升江西泰和縣人弘治癸丑進士授翰林院編修  
十三年陞南京國子司業正德三年忤逆瑾黜爲民五年起原  
職七年陞南京太常寺少卿十年陞南京吏部右侍郎十四年  
改吏部十六年轉左嘉靖元年陞南京吏部尚書二年改禮部  
未任詳吏部尚書

國朝列卿紀卷之二十七終